

29,565/B

plate wanting
but included in Haller
Icones anatomicae Fase I



Digitized by the Internet Archive
in 2019 with funding from
Wellcome Library

<https://archive.org/details/b30512840>

D v h
-15

54965

IO. IACOB. HVBER
DE
MEDVLLA SPINALI
SPECIATIM
DE
NERVIS AB EA PROVENIENTIBVS
COMMENTATIO
CVM ADIVNCTIS ICONIBVS.




GOTTINGAE MDCCXLI.
LITTERIS SCHVLTZIANIS

APVD ABR. VANDENHOECK ACAD. TYPOGR.

THE MEDICAL JOURNAL

OF THE MEDICAL SOCIETY OF THE DISTRICT OF COLUMBIA

FOR THE YEAR 1880



PRINTED BY THE DISTRICT OF COLUMBIA

AT THE OFFICE OF THE SOCIETY

1880

ILLVSTRISSIMO ATQVE EXCELLENTISSIMO DOMINO

DOMINO

GERLACO ADOLPHO
L. B. DE MVNCHHAVSEN

DYNASTAE IN STRAVSFVRTH

AVGVSTISSIMI MAGNAE BRITANNIAE REGIS
DVCIS ELECTORIS BRVNSVICO - LVNEBVRGICI
MINISTRO STATUS ET CONSILIARIO

INTIMO

MAGNO DVCATVS CELLENSIS ADVOCATO
ET

AD COMITIA FRANCOFVRTENSIA
IMPERATORI ROMANO ELIGENDO

LEGATO PRIMARIO

MAECENATI OPTIMO

ILLV.

ILLVSTRISIME ATQVE EXCELLENTISIME
D O M I N E
DOMINE GRATIOSISIME

Tot tantaque video, vel grauissimi argumenti,
vel absoluta numeris suis, scripta, Tuo IL-
LVSTRISIMO NOMINI, MAECENAS OPTIME, di-
cata; vt fere pudeat tam leui scriptiunculae TANTI
HEROIS nomen praefigere. Summa autem tua hu-
manitas, animusque indulgentiae plenus, ipsique tam
faciles ad Te aditus, sinunt, vel inuitant potius vnum-
quemque, vt sua Tibi monumenta offerre, Tuo no-
mine

mine decus ac perennitatem illis conciliare, audeat. Suo autem quodam iure facere sibi videntur, qui afferunt aliquid, quod in sinu Tuo, in hac Musarum sede, natum fuerit. Tale est, leuissimum licet alioquin, quod deuota ac venerabunda mente Tibi, ILLVSTRIS-
SIME DOMINE, iam offerre sustineo: eiusmodi nempe, quo debitam Tibi otii pariter atque officii mei rationem, ex parte saltem, reddere me posse sperabam. Per Te enim tuamque Prouidentiam cum caetera omnia, tum instructissimam habemus aequae ac commodissimae officinae, intima, quantum res patitur, corporum cuiuscunque aetatis, sexus, status, valetudinis, humanorum, curiosa arte rimandi; quae sane rara per Germaniam opportunitas docentium pariter artem salutarem ac discipulorum commoda ita promouet, ut, nostra si bona nouimus, iisque strenue utimur, magna inde, non ad anatomicam modo subtilitatem, sed ad ipsam corporum viuorum salubritatem, incrementa expectari spe minime fallaci queant. Est hoc eiusmodi, ut dum hoc opusculum sub prelo feruet, id est intra quatuor hebdomadam decursum, plus decies inspicere interiorum humani corporis compagem licuerit. Haec, inquam, faciunt, ut nemo sit, ad quem hoc ipsum opusculum, ex ista contemplatione natum, referri meliore iure debeat. Igitur accipies, propria tibi humanitate, descriptam nobilissimam, & affinem admodum cerebro, corporis nostri partem, quae imaginem mihi quandam Tuorum operum videtur habere, quibus vitam & motum civilem populis Germaniae, AVGVSTISSIMO

REGI nostro parentibus, ipse, means quasi per omnia,
dispensas, non minus necessarius rebus nostris, quam
est illa capitis & cerebri vis per totum corpus nostrum
fusa. Faueat nobis porro Deus, & Te amicum & ne-
cessarium Reipublicae pignus, omni felicitate cumu-
latum, seruet quam diutissime.

ILLVSTRISSIMI NOMINIS TVI

Dab. ex Georgia Augusta
d. vii. April. 1741.

ADDICTVS

IO. IAC. HVBER.

CONSPECTVS.


§. I.


Quid peractum sit in Programmate nostro de Medulla spinali, & quid nunc dicendum sumserim.

- §. II. In quantum filamenta neruea considerentur.
- §. III. Medullae spinalis diuisio in quatuor Virgas aequales, duas laeues, duasque filamentosas.
- §. IV. Quaedam de Ligamento medullae se immittente; ac de Ligamento denticulato.
- §. V. De quatuor Virgis filamentorum in genere.
- §. VI. De differentia inter Nervos Cerebri atque medullae spinalis intercedente.
- §. VII. Quo referendus sit Nervus Accessorius, vbi simul probatur, nullam H. C. partem prae altera existere.
- §. VIII. Nerui ad octauum par Accessorii descriptio. Quo modo nervus ille interdum originem posticam Nerui primi paris cervicis dimittat.
- §. IX. De Varietatibus Nerui Accessorii. Quaedam de Filamentis nerueis ad duram matrem pertinentibus.
- §. X. & XI. Anatomicorum diuersae de Neruo Accessorio sententiae allegatae. Nerui huius Inuentor.
- §. XII. Nerui primi paris spinalium seu decimi WILLISII descriptio.
- §. XIII. Ratio cur Nervus decimus WILLISII spinalibus annumerari debeat. Diuersae de eius exitu e theca ossea opinionones. Varia eius nomina.
- §. XIV. Quid mali euenerit in Anatomicorum scholis post WILLISIVM ratione nerui huius.
- §. XV. Precipuorum quorundam Anatomicorum sententiae de postica nerui huius origine.
- §. XVI. De vero Nerui huius Inuentore, ac Aliis, bene de illo meritis, quoad eius originem posticam.

§. XVII.

- §. XVII. Quaedam de Virgis filamentorum in genere. Nerui secundi paris Vertebraliū descriptio quoad origines.
- §. XVIII. Descriptio Nerui tertii paris.
- §. XIX. - - - - - quarti & quinti P.
- §. XX. - - - - - sexti, septimi & octauī P. An in neruorum structura ratio lateat, quod quidam ambidextri sunt? Breuissima indicatio, quo modo Nervus Diaphragmaticus generetur.
- §. XXI. Descriptio Nerui noni Paris.
- §. XXII. - - - - - decimi P. & seqq. ad decimum septimum vsque.
- §. XXIII. - - - - - decimi octauī P. & seqq. adusque vigesimum primum.
- §. XXIV. - - - - - Vigesimali secundi, tertii & quarti, P.
- §. XXV. Quaedam de natura Caudae Equinae. De Medullae Spinalis Eminentis, in quas desinit infimus eius apex.
- §. XXVI. Descriptio Nerui vigesimali quinti & seqq. adusque trigesimum seu vltimum par.
- §. XXVII. De numero Neruorum Vertebraliū in integrum. De singulari interdum Ganglii penultimi nerui structura. De Vertebrarum numero & varietatibus, & imprimis ossis sacri.
- §. XXVIII. De summa necessitate Nervos Vertebrales in perpetuas classes redigendi.
- §. XXIX. De Neruorum Vertebraliū dispositione in classes suas; & primo de Neruis Ceruicis.
- §. XXX. De Neruis Thoracis.
- §. XXXI. - - - - - Lumborum.
- §. XXXII. - - - - - Ossis Sacri.





§. I.

Non absque fiducia in *Programmate meo de Medulla spinali* promittere potui, me & alteram eius tractationem anatomicam, quam primum latentis huius partis exactiorem acquisivissem cognitionem, traditurum fore, Iconibusque rem illustraturum. Quod nunc pro viribus praestare conabor. Arduam equidem rem, materiemque intricatissimae, & mirae variantis structurae, describendam mihi sumsi. Si tamen quis considerabit humanorum Cadaverum numerum, sexaginta excedentem, quae mihi ab eo tempore, (per 4. scilicet annos) quo Professoris munere hic fungor, non solum secare licuit, sed & praeunte ac demonstrante Viro, in hac etiam arte summo, ALB. HALLERO (cuius nomen ob eminentia merita non absque summa admiratione commemorare possum; mihi enim & nunc & olim honori erit tanto Viro ac Praeceptore longo tempore vsum fuisse, cui debeo, si quid est, quod in hac arte ac in botanicis scio) lustrare datum fuit; is, inquam, facile animadvertet, non temere a nobis illud argumentum selectum esse, quod sine ampla inspiciendorum Cadaverum facultate, ex exquisita attentione, rite expediri non potest. Quod autem natura non semper eundem per omnia tenorem in hac parte servet, docet eius constructio in aliis subiectis alia, & quandoque non parum ab ea, quae communior est, recedens: quae omnia, vti observata fuerunt, ingenue proferre malo, ac debeo, quam varietates praeterire, & secundum certas regulas Medullam spinalem constructam asserere. Haec in antecessum nota esse volo, ne amplis circumscriptionibus vnaquaeque

A

tenu.

tenuis varietas significari debeat. Egi in Programmate de ipsa Medulla spinali, de eius tunicis, atque de ligamento denticulato. Nunc mihi de nervis, ab ea prouenientibus differendum sumsi. Alia alias. Non ignorabam cum ad scribendum me contulissem, quam difficile esset huic saeculo satisfacere in argumento nondum pro dignitate tractato. Occurrebat inuidia, si Viris magnis, & praeclare de re etiam anatomica meritis, contradicendum esset. Vicit tamen haec & alia studium pro virili merendi de anatome, cuius tantam mihi facultatem muneris ratio praebebat. Neque puto irate laturum quemquam, si hic inueniat secus, quam adhuc factum est, tradita. Veneror superiorum diligentiam: sed hac in re naturam solam magistram agnosco. Et si a via, a natura scilicet, hinc inde aberrauerim, quod cuique naturale est, facilis ero eam rursus ingredi, quam primum mihi monstrabitur. Et meliora docens in me nunquam renuentem & obstinatum habebit.

§. II.

Si medullam spinalem ab omnibus inuolucris suis denuda-
verimus, eo excepto, quod illam arcte cingit, proximeque
coercet, & piaae matris progenies est; tunc tota fere superficies
filamentis nerueis horrere deprehenditur. Filamenta ista, in
certos ac determinatos fasciculos congesta, nervorumque con-
iugia constituentia, pro diuersa regione sunt diuersa. Alia enim
breui congeruntur, duramque matrem e directo subeunt, &
numero plura sunt: Alia longius protrahuntur, priusquam
inuolucrum a dura matre perforant, suntque pauciora, vel eti-
am crassiora, aliamque directionem habent, & quae sunt aliae
diuersitates, suis locis indicandae. Cum itaque tantum interce-
dat discriminis inter dicta filamenta, de singulis, data prius totius
compagis idea generali, seorsim agi necesse erit. Iuuat ante o-
mnia praemonere, per omnem tractationem non de penitiori fi-
lamentorum nerueorum structura agi, quam quae nudis, oculis,

lis, quantum piaë matris propagines videntur, offertur. Quomodo quidem ea intus se habeat, & quid ibi armato oculo detegi possit, silentio praeterire suadet summa medullae mollities, atque natura singularis intimiorem analysin recusans. (I)

(I) Quapropter hic proluxae illi, de vera spinalium nervorum origine, liti me immiscere nolo. Non possum tamen facere, quin pauca dicem, quae ad rem nostram pertinent. Originem eorum non altius derivare volumus, quam a cuiusvis nervi exitu e medulla. Siquidem nulla arte medullares fibrae, s. striae, in ea detegi possunt, quales per ipsam Cerebri substantiam excurrentes in plerisque nervorum Cerebri conspiciuntur. Laevis & aequalis medullae spinalis substantia oculatissimum naturae scrutatorem LEEVWENHOECKIVM elusit. Si igitur sunt tales striae, adeo tamen debent esse subtiles, ut armatissimos illius Viri oculos subterfugerint. Et fac adesse, non tamen ideo BLASII *de medull. spinal.* p. 52. sententia, de nervorum spinalis medullae filamentosa & membranacea structura, arripienda est. Contra quem BOHNIVS iam scripsit *Circul. anat.* p. 295. Minus adhuc iis assentiendum esse puto, qui vertebralium nervorum originem a Medulla oblongata, vel altius adhuc derivant. Sed quamvis partem, Cerebrum, Medullam oblongatam, & Medullam Spinalem, suos dimmittere nervos, iisque agendi vim impertiri, putare malim; cum praesertim illud Nervus Accessorii origo suadet. Nec puto Medullam Spinalem unius lateris producere Nervos alterius lateris; quamquam PETITVS *Lettres d'un Medecin* p. 7. & fig. I. D. in infima cauda medullae oblongatae, s. initio medullae spinalis, fibras medullares, ab vno medullae latere in alterum se decussando transgredientes vidisse asserat; & ante eum iam HIPPOCRATES, CAESALPINVS, ac plerique veterum existimarint, nervos dextri lateris a sinistra medullae parte oriri, & sinistros a dextra; quibus assentire nondum possum. Quidquid huius est, illud tantum in perfecta structura corporis nostri valet. Quamprimum vero ea a naturali statu recedit, acutissimorum hucusque hominum ingenia elusit. Vbinam originem atque aruum nervorum ponamus in iis, quibus Cerebrum deest? Et unde medullares suas fibras accipiunt nervi, quando Cerebrum, Cerebellum, & quandoque etiam Medulla spinalis deficit? qualia exempla hinc inde prostant plura. Et quis novit an futurae aetati reservatum sit, Peplum illum naturae aliquanto magis retegere?

§. III.

Itaque, ad evitandam omnem obscuritatem, alias facile ex nervorum filamentorum ortu atque concursu vario oriundam,

Medullam spinalem, a quatuor diuersis regionibus aspectam, considerabimus. Quod eo commodius & aptius fieri potest, cum ipsa medulla quatuor distinctis eorum filamentorum originibus proprie gaudeat, totidem series, ex continua quasi, per omnem medullae decursum, & recta linea prodeuntes, constituentibus, interposita semper binis earum serierum portione, s. virga laeui, sola pia matre inuestita, & filamentorum experte. Si iam medulla spinalis per medium verticaliter in quatuor partes aequales secatur iis sectionibus, quarum vna anticam & posticam partem, altera dextram & sinistram accurate biseget, seque adeo inuicem ad perpendicularum scindant, tunc quaeuis earum e medio exterioris circumferentiae suae egredientem exhibebit filamentorum seriem vnam, binis dimidiatis portionibus laeuibus interceptam. Erunt itaque secundum generalem diuisionem alia filamenta dextra, alia sinistra; quam distinctionem etiam nervi, inde producti, & coniugiorum nomine venientes, seruant. Specialior dein horum filamentorum diuisio (qua a nervis Cerebri distinguuntur) est in filamenta antica, corpora vertebrarum respicientia, & postica, spinae propiora.

§. IV.

Hinc etiam quatuor Medullae spinalis facies, siue virgas laeues, considerandas habemus, binis singulas filamentorum seriebus interpositas. Facies s. virga dextra a sinistra non differt; differunt autem ab antica & postica ligamento suo denticulato, cuique lateri proprio (1), tum latitudine, illis paulo maiore. Sed quomodo antica & postica facies inter se differant ex parte dictum est (2). Porro sciendum est, quod filamenta antica sibi proximiora exoriantur, ibique exilius spatium laeue relinquant, quam in facie postica, & quod filamenta antica citius, id est altius, concurrant versus medium medullae, & in postica tardius seu inferius. Id porro semel adhuc heic repetam; quod filum il-

lud

lud, f. productio f. immissio piaë matris per medium Medullae ab antica parte excurrens, medullam non intimius penetret, quam ad eius portionem cineream vsque, quandoque vero illam non tam profunde secet (3). Addam insuper, nullum penitus filum tale in postica facie intra medullam immitti. Quod, anatomicis quanquam aliter sentientibus, eo audacius asserere possum, quo frequentiori autopsia ea de re conuictus sum (4). Quamuis de Ligamento tenui, pellucido, denticulato, filamentis neruorum vtriusque lateris interposito iam actum sit in Programmata (5): de vera tamen eius origine atque firmatione exactiora & certiora, quae me frequens inspectio docuit, tum icone exprimenda potui curare, tum hic tradere possum; quod facere, & superiora adeo emendare, quemque veritatem, non scripta sua amantem, decet. Primam suam ac supremam cum dura matre adhaesionem, reliquarum insertionum suarum in morem, denticulatam quidem, sed robustiorem paululum, nec breuem admodum, facit ad tumentem oram ossis occipitis, paulum supra foramen Arteriae Vertebralis, inferius tamen & paulum exterius quam est nerui noni paris Cerebri exitus ex Caluaria. Primus iste ligamenti dens quasi tenuis exit a dura matre, & per breue spatium liber oblique introrsum descendit, priusquam Medullae spinalis intimo inuolucro adplicetur, quod inter primi (6) & secundi neruorum Ceruicalium filamenta fit. Reliquos suos dentes dimittit dicto ibi (7) modo; non tamen certam distantiam f. medium semper interstitii binorum neruorum locum obseruantes, sed modo altius, modo profundius insertos, nullum vero interstitium transfilientes, vsque dum corpus medullae, quod ipsum tamen quoque variat, defierit. Dentium f. ligamentulorum eorum, connumerando supremum, nunquam vltra viginti tria paria deprehendimus, saepe pauciora.

(1) De hoc videatur *Programma nostrum de Medulla spinali* §. IX.

(2) ibidem §. X.

(3) Quamuis RIOLANVS *Anthropolog.* C. 49. L. V. asserat spinalem medullam esse
Cor-

Corpus bipartitum, atque tenui meninge secretum, ita ut una pars resolui possit, integra & illaesa altera. Frequentissime tamen perspecta structura, a naturali non recedens, & perfecta, nos aliud docet.

- (4) Ex duplici fissura, quam BLASIVS *de medulla spinali* p. 48 Cani, Vitulo, agno adscribit, ad hominis structuram argumentandum non esse, autor ipse fatetur; dicens se ignorare, an eo modo res se habeat in homine. Quanti ergo BLASII tractatulus anatomicis hodiernis, non brutorum sed hominum Cadauera abunde satis tractantibus, usus esse possit, ex ipsius verbis elucet. Sed maius longe argumentum contra nos est *Cel. MORGAGNIVS adu. VI. anim. XIV. WINILOWIVS Trait. de la Tête n. 124. PETITVS Lettres d'un medec. p. 15. & fig. II. A. B.* alique, duplicem medullae fissuram, in vtraque facie vnam, agnoscetes: Si forte ratiocinio analogico anticae medullae faciei inducti fuere, vel potius molli medullae substantia. De filo per omnem medullae longitudinem ab antica facie excurrente nemo dubitare potest, a postica autem nullum conspicitur filum medullam dissecans; Dissecando interim hic etiam, vel inflando facile est cuique pro lubitu crenam aliquam efficere, quae prius non existerit. Ita ob summam quoque medullae mollitiem, lenissimae vi facile cedentem, ventriculus quartus inflatione vel separatione medullae per omnem fere longitudinem colli descendens vtcunque parari potest. Eo minus ergo mirandum, si quandoque integra coeteroquin medullae structura servata absque flatu ventriculus quartus ad aliquot usque nervorum colli paria descenderit, uti MORGAGNIVS *Adu. anat. VI. animadu. XIV.* observavit; & ipse ego illum infra primum par Nervorum Cervicalium integrum adhuc reperi. Si quid unquam a postica medullae facie (ut ad filum redeamus) conspici potest absque arte, illud non erit piaë matris filum se immittens, sed aliqualis crena in ipsa medullae superficie, nec haec distincta magnopere.

(5) *paragraph. nono.*

- (6) Sciendum est, me ab eo nervo, qui ab aliis decimus Cerebri appellari solet, numerare incipere, quia illi, uti demonstratur §. IX. omnia attributa competunt, nervos spinales a Nervis Cerebri distinguunt.

(7) *Progr. §. X.*

§. V.

Quatuor illae filamentorum nervorum series (1) sibi inuicem perquam similes sunt, & inter dextrum latus atque sinistrum fere nihil intercedit differentiae, quanquam non plane eadem sint. Attamen filamenta anteriora posterioribus sunt paulo tenuiora, numero tamen vix pauciora. Filamenta haec cuius-

uis

uis seriei omnia fere, inprimis suprema & infima, sibi per omnem medullae longitudinem arctissime apposita sunt, ad primum scilicet e medulla egressum, vbi quoduis eorum vicinum suum ita attingit, vt nondum in paria diuisa, nec in determinatos fasciculos congesta sint. Quod necessario ita fieri debuit, vt spatium consulatur; nam Medulla spinalis ipsa exacte vna tertia parte minor vel potius breuior est, tota spina ossea, quo cautum esse videtur a summo Artifice, ne Medulla spinalis productione vel prolongatione sua per omnem thecam osseam varios vehementissimosque corporis motus, qui in ea regione peraguntur, vel impediret, vel ab iis facile nimis laederetur. Vnde etiam factum est, vt filamentorum decursus longe alius sit in inferiore spinae parte, quam in superiore. Quo enim proximiora sunt ossi occipitis, eo etiam breuiori via, magisque è directo duram matrem subeunt, minusque spatii inter eorum exortum intercedit atque collectionem durae matris ope in communem Nerui truncum. Quo magis autem ad inferiora properant, eo longius distat ortus eorum ab egressu, magisque deorsum decurrunt, & vti superiora filamenta e medulla ad angulum rectum egrediuntur, ita infima ad angulum deorsum acutissimum exeunt. Sicque sensim magis magisque flexuosum acquirunt descendendo decursum. Quomodo autem filamenta ista collecta, & inuolucro suo duro obiecta, neruorum specie thecam osseam penetrant, suo loco dicetur. In genere tamen hic notandum est, filamentorum nerueorum decursum longe diuersum esse a decursu ipsorum neruorum, nec confundenda esse; cum filamenta nullibi adscendant vti Nerui Ceruicis.

(1) Quatuor hasce filamentorum series, neruosque ex iis productos elegantissime iam descripsit VOLCH. COITER *externar. & internar. C. H. partium Tabulae &c. p. 108.* & depictae iam exstant in EVSTACH. *Tabulis XVII. & XVIII. Edit. Rom.*

§. VI.

Iam ad nervos nos accingere debebamus, eosque ex ordine tradere; Quum vero non pauca prius praemonenda occurrant, iis paulum immorabimur. Quantum discrepent scriptores anatomici recentiores aequae fere ac veteres in numerandis paribus Nervorum, nemini latet; nec, quantum disputatum sit ab eo inde tempore, quo WILLISIVS Cerebro decem paria adscripsit, quinam nervorum vertebraliū primum locum tenere, nomenque inde accipere debeat. Quod attendenti ad nervorum é theca sua oslea egressum, & ad eorum structuram atque ortum, determinare facile erit; & inde cuique absque vlla difficultate vel confusione nomen suum locumque assignare. Vnicus inter nervos Cerebri & Medullae spinalis, ambiguus quasi, fluctuat. Ille nempe nervus, quem WILLISIVS decimum cerebri vocat, & quem ante WILLISIVM iam antiquissimi anatomici primam azygiam nervorum Nuchae tradiderunt; Recentiorum alii WILLISIVM secuti sunt, alii illum ad nervos vertebrales, ob aliam quam veteres rationem, retulerunt; & alii ob summam, vti dicunt, ambiguitatem singulari nomine signarunt. Ad dirimendam hanc litem optimum fuerit ante omnia observare differentiam, inter nervos Cerebri, & medullae spinalis intercedentem. Quae ex his petenda erit.

I. Quiuis nervorum Vertebraliū duplici conflatur filamentorum nervueorum serie, antica alia, alia postica, quibus interseptum est ligamentum denticulatum (1). Hoc nulli nervorum Cerebri competit (2).

II. Nervorum Vertebraliū unusquisque post superatum commune, a Dura Matre productum, inuolucrum breui in ganglion suum absque alterius nervi filamentorum accessione, intumescit (3). Quo facile distinguuntur a nervis Cerebri, vt & a nervi Intercoastalis gangliis, alio longe colore (subrubente) praeditis. Nec minus distinguuntur a ganglio Ophthalmico,
albo

albo quamuis & splendente; quippe quod ex binorum neruorum concursu (ex ramo quinti paris ophthalmico, & ex accedente filo tertii paris, intra orbitam super neruum Opticum concurrentibus facto) generatur.

III. Nerui spinales differunt a Neruis Cerebri ratione egressus extra thecam osseam. Nerui enim spinales omnes per interstitia vertebrarum, a duabus vertebrae relictæ, vel a vertebra & vicino osse (quod de primo & ultimo pari valet) facta, egrediuntur (4). Cum e contra Nerui Cerebri omnes aut per propria foramina caluariae, aut per laceros eius sulcos exeant (5).

IV. Ratio porro petenda esset ex ortu neruorum, quantum quidem nudis oculis videri potest; Quia vero Medulla spinalis fere nihil singularis habeat, quo a Medulla oblongata distinguatur, praeter arctum durae atque piaë matris ambitum, huiusque immiſſionem; vt fere ex arbitrio cuiuslibet pendere videatur, ipsi limites infra vel supra decimum Par WILLISII ponere; nisi tamen immersio eius intra specum vertebrarum id prohiberet. Malo tamen, ob dictum inuolucrum, & ventriculi quarti finem ibi, & praeprimis ob Medullae ingressum in specum vertebrarum, inter nonum par Cerebri atque decimum WILLISII primum initium ipsi adscribere; quanquam mihi in Programmate (6) ex nimia festinatione aliter visum fuerit. Ne tamen quis putet, nos in gratiam Nerui decimi WILLISII, illum inter vertebrales numerantes, tam alte Medullam spinalem adoriri; erit ei instar omnium auctoritas *Cel: MORGAGNI*, nobiscum facientis; quanquam ipsemet Neruum illum pro vertebralium primo connumerauerit (7).

(1) Ne tamen quis, nullum ligamentum denticulatum Neruorum Caudae equinae interstitiis interpositum videns, sed in solis superioribus, male intelligat, vel interpretetur verba nostra; ille meminerit, ligamentum illud denticulatum ad apicem vsque medullae pertingere, (vti dictum est in Progr.

§. IX.) hinc quoque illud inferiorum neruorum filamenta, ad primum e medulla egressum, seiungere, anticisque eorum ac posticis interiacere.

(2) Horum omnium ortum graphice descripsit *Cel. HALLERVS Commentar. in Boerhaau. Praelect. Acad. Vol. II. p. 517. &c.*

(3) Quis vnquam vidit Ganglion Neruorum Cerebri, nisi a concursu binorum neruorum productum? Ita quoque, praeter supra allegata Ganglia neruorum Cerebri, intumescenciae quaeuis Nervi octauus & noni paris in supremo collo nihil aliud sunt, quam combinationes quorundam filamentorum neruorum, a diuersis neruis productorum. (Ibi quandoque Nervus octauus paris tam insigniter tumescit, vt vero ganglio similis sit, quamquam Anatomici id verum ganglium agnoscere nolint.) Quis porro ignorat neruos Cerebri omnes, plurimis quemque filamentis constare, nec tamen vllus eorum neruorum, communi durae matris inuolucro accepto, in ganglion intumescit. Cum contra quiuis neruorum vertebrali-um ganglion suum propriis tantum nerueis filamentis producat, vti omnibus notum est.

(4) Hoc argumento Vetustissimi Anatomici a GALENO ad hodierna tempora vsi fuere, ad seiungendos Neruos spinales a neruis Cerebri.

(5) De transitu horum neruorum per foramina sua consulatur I. BAPT. BIANCHI Tabula, atque explicatio eius, MANGETTI Theatr. anat. inserta Tom. II. p. 342. Tabula extraordinaria V. fig. I. Vel quoque RIDLEY fig. II. aut. *Cel. BVXTORFII* Icon, Thesibus anatomico-Botan. praefixa.

(6) §. V. p. 5.

(7) *Adu. anat. VI. animadu. XXXII.* Possent praeterea innumeri Anatomici ad roborandam hanc sententiam allegari. Veteres enim a GALENO ad WILLISIVM omnes, medullam iamiam prolapsuram esse dixerunt in cavum Vertebrarum, quando ea primum neruum Colli emittit.

§. VII.

Cum iam semel litem suscepimus de nominationibus atque differentiis neruorum, non possumus non eam vltra persequi, & quo *Nervus* ad octauum par Cerebri *Accessorius* referendus sit, dicendum suscipere: qui equidem satis ambiguus est inter neruos Cerebri, & neruos Spinales, vt impossibile sit illum se-

cun-

cundum dictas §. VI. differentias, ad hos vel illos referre. Illi commixti aliquid insitum est, de amborum neruorum proprietatibus participantis. Natura scilicet nullibi non concatenatione & permixtione sua res mire implicat, determinatos & in oculum cadentes limites effugiens; quod vti de omnibus Vegetabilium, Animalium, & Mineralium classibus, pariter & Regnis, inter se vicinis, valet; ita etiam in vnoquoque indiuiduo, vel minima eius parte singulari, eadem seruatur ratio, mira nempe rerum omnium concatenatio. Caeterum quae de duplici Nerui Accessorii origine disputata sunt, cui rei similia multa in quouis corpore organico deprehendimus, ea sufficere possunt, ad explicandam, vel potius intelligendam, omnium partium praeexistentiam in primis rudimentis cuiuscunque Entis physici. Et vt propius ad argumentum nostrum accedamus, nihil absurdi affirmari puto, si vel ex sola intricata, & mire de Cerebro ac Medulla spinali participante, hasque duas partes combinante quasi, structura atque itinere nerui Accessorii, pro certo cognosci dicam; nec Cerebrum Medullae, nec hanc Cerebro suam debere originem (1). Et sic de reliquis quoque corporis nostri partibus cogitandum est, quae semper magis magisque perficiuntur, quo propius ad facultatem, sui simile producendi, perueniunt. Redeamus in viam. Nervus Accessorius primum quidem principium suum proprie a Medulla spinali, iam per aliquot vertebrae prolapsa, desumit; sed ganglio caret, & per foramen calvariae exit: sed tamen non exiles nec paucos etiam accipit propagines ab ipsa medulla oblongata (2). Congrue itaque nervus iste, pro intermedio, (qui nec ad Cerebri Nervos, nec ad spinales, vti BIDLOVS. HEISTERVS. alique putant, referri potest, sed vere ambiguus nervus est) Medullam spinalem Cerebro iungente, habendus est. Hinc primus describendus venit.

(1) De hoc prolixius egimus in Progr. §. IV.

(2) Ex sola huius nerui origine varia, & ex radicularum eius, modo ad angulum rectum, acutum, vel & acutissimum, in trunculum insertionem (vti ex insequenti §. atque ex Icone patet) probe consideratis, facile erit, nervis chordularum tenfarum more agendi vim abrogare. Si dein huic argumento Neruorum colli ad angulum rectum egressus, aliorum ad angulum deorsum acutum, tandemque infimorum vertebrarum ad angulum acutissimum exitus, ac ipsorum nerueorum filamentorum diuersa directio additur, ipsiusque nerui Intercostalis ortus, variaeque commissiones cum aliis nervis; tunc evidens satis erit, Nervos quacunq; alia potius vi agere, quam ea, quam in fibris & chordis tensis obseruamus.

§. VIII.

Tam intricatae, tenuis, nec non variantis aliquantum structurae est *Nervus ille ad octauum par Accessorius*, vt frequentissime occurrentem, ac veram in adultioribus Cadaueribus obseruatam, & pro constanti habendam, prius tradere velim, ac dein conformationem, a communi paulum recedentem, & ex iunioribus Cadaueribus depromptam, subiungere.

E multiplici nerueorum filamentorum propagine conflatur, aliis a medulla oblongata, aliis a spinali, ad determinatas distantias prouenientibus. Totus in postica Medullae facie latet, nec ab antica prius conspici potest, quam Cranium subierit; Medullae spinali arcte adhaeret & inter filamenta eius postica (quibus tamen propius & arctius adhaeret quam ligamento) ac denticulatum ligamentum, viam sibi facit: vt proprie loquendo non dici possit, eum inter anteriora & posteriora Neruorum Colli initia positum esse. Infima s. prima Nerui huius Accessorii radícula subtilissima, nudis oculis ad medullarem vsque substantiam non consequenda, ortum ad filamenta posteriora Nerui septimi paris Cervicis, (connumerando decimum WILLISII) desumit, & e supremo quasi dicti Nerui filamentum principio, leniter extrorsum arcuato, progredi videtur. Et ita instar fili argentei, in vel intra piam matrem

matrem positi, & translucens, ad filamenta postica sexti paris recta adscendendo peruenit, & ibi piam matrem superat, & extra illam clarius conspici incipit. Abhinc euidens satis, sensim magis magisque extrorsum inclinando, & ligamento denticulato accedens, adscendere pergit tam diu, vsque dum omnes, ad foramen suum properans, acceperit radículas suas. Nimirum in via, a primo exortu adusque foramen suum, radículas s. filamenta accipit, tam a medulla oblongata, quam spinali, plurima, indeterminata quanquam, nec omnibus & singulis indiuiduis numero aequalia; eorum tamen plerumque decem pro quouis neruo reperiri solent, quatuor intra caluariam a medulla oblongata ipsi illargita, lateraliter prodeuntia, caetera medullae spinalis propagines sunt, & ad filamentorum nerueorum posticorum ortum profiliunt. Primum filum, vel additamentum infimae radiculæ, tenue admodum, ita exit a quinto pari, quasi ab eius filamento, quod posticorum supremum est, proueniret, paulo supra ortum suum primæ se radiculæ ad angulum deorsum acutum immiscens. Alterum trunculus plerumque accipit a mediis filamentis (posticis sc:) quarti paris, in integrum obiectum. Tertium, priori paululum longius, simili modo ut primum, a quarto pari procedere videtur. Quartum ad superiora tertii paris filamenta, obiectum iis uti secundum, gracile exit, & extrosus sursumque vergendo cum trunculo coit. Quintum, ex exili interstitio & laeui, inter filamenta tertii & secundi paris relicto, prodiens, simili ratione ut priora, oblique sursum vergit, ad efficiendum cum aliis truncum. Sextum ex ipsis quasi supremis filamentis secundi paris ad augendum truncum dimittitur. Postquam dictas radículas accepit, & aucto trunco ad primum Neruorum Cervicalium par peruenit, lusum naturae experitur, pro diuersis subiectis varium. Quandoque enim filamenta neruea, quae primo pari posticam originem dare solent, tota in se recipit Nervus Accessorius; quo in casu vel e regione eorum, absque per-

ceptibili tamen continuitate, duo filamenta dimittit, vel etiam vnum solum, altius exiens, & crassius, eorum vices gerens, pro supplenda postica primi paris origine. Non raro etiam in gangliolum (1), vix hordeaceum, intumescit Nervus Accessorius a recepta origine postica primi paris; ex quo ganglio demum exit filamentum plerumque vnicum, crassiusculum, in foramine arteriae vertebralis origini anticae primi paris combinatum, & in unum nervum concretum. Hae sunt varietates hic loci occurrentes, quarum vnamquamque non semel vidi. Ordo vero, quem natura ordinario servat, longe recedit ab his observationibus, dum Nervus Accessorius liber plerumque, & absque vlla communicatione, ante originem s. filamenta postica nervi primi Cervicalium (qui vt semel adhuc moneam est decimus WILLISII) procedit, diuergendo paulum a medulla, & oblique extrorsum sursumque vergendo; & ita superata vertebrarum theca, & ad eminentem ossis occipitis oram delatus, reliquum itineris sui, filamentosas radículas accipiendo, absolvit. Ultima filamenta intra caluariam ad roborandum Nervum Accessorium accedentia sunt distinctissima semper, numero plerumque quatuor, ex pluribus filamentosis & tenuissimis originibus conflata; ita tamen, vt plerumque (quanquam & haec suas habeant, leves tamen, diuersitates) duae pro quouis filo profiliant e medulla oblongata radícula, in linea fere recta, inter nervum octavi paris cerebri, primumque colli dispositae, posteriores tamen, quam sunt filamenta noni paris. Filamentorum eorum duo inferiora ad angulum rectum, superiora ad acutum deorsum, inferuntur. Ita nervus iste ex subtilissima prima radícula se ad altiora euehens, & filamentorum augmento sensim magis magisque crassescens, tandem truncum efficit conspicuum. Qui, paulo altius extrorsum surgens, ad filamenta octavi paris accedit, & ordinario filamentorum tenuissimorum ope ei arctius adhaeret, communeque cum eo foramen durae matris & cranii subit. Non raro quo-

quoque eum (neruum accessorium sc:) absque hac commistione, & seiunctum, duram matrem inferius paulum perforare vidi, modo in dextro, modo in sinistro latere 2). Nerveus iste, per omnem suum ad medullam spinalem decursum, filamentis nervorum posticis obiectus est; nec bene conspici potest, nisi iis abscissis, vel reclinatis.

(1) Huc sine dubio referri poterit Ganglion illud WINSLOWII *Traité de la Tete* n. 160. & quod *Tr. des Nerfs* n. 144. ita describit: *Chacun de ces deux Nerfs accessoires étant monté au dessus de la premiere vertebre, s'attache derriere le ganglion du Nerve Sous occipital.* Ibi enim loci, de quo WINSLOWIUS loquitur, nullum vnquam aliud reperi ganglion, quam quod a concursu filamentorum posticorum nervi primi paris (s. Infra occipitalis WINSLOWII) generari quandoque solet. Quando autem WINSLOWIUS in descriptione sua pergit, ib. dicens: *J'ai trouvé ces deux filets* (quae filamenta ego pro origine postica nervi primi paris colli habeo). *sans communication avec le ganglion, ni avec le plan antérieur.* non video, qualium filamentorum nervorum concursu efficiatur illud ganglion, & quamquam WINSLOWIUS ibid. illud ganglion Nervus Infraoccipitalis appellet, non tamen percipio, quomodo pro tali haberi possit; cum Nervus Infraoccipitalis ganglion, secundum ipsius autoris descriptionem, ibid. n. 159. bene demum extra foramen huius nervi osseum generari dicat. Quum itaque ex comparata WINSLOWII descriptione horum binorum gangliorum n. 144. & 159. ea nec combinari, nec pro vno eodemque haberi possunt; illud n. 144. nostrum supra indicatum esse puto; alterum autem n. 159. erit ganglion nervi primi paris Cervicis §. nostro IX. describendum, siue Infra occipitale WINSLOWII. Cuique tamen rem iudicandam relinquo, si forte viri doctissimi verba aliam quoque interpretationem admittant.

(2) In quibusdam enim Cadaveribus non solum Nervum Accessorium per singulare durae matris foramen (quod frequentissime evenit) exire vidi, sed & suprema filamenta Nervus Octavi paris; ut ita non raro ipse octavi paris Nervus duo foramina habeat in dura matre, & tertium foramen efficiatur a Neruo Accessorio. Similis quoque structura in aliis, longe minoribus nervis observatur. Ita quoque vidi, filamenta Nervus sexti paris duo distincta foraminula, cum intercedente septulo, efficere, pro eorum transitu, quae demum extra duram matrem communem truncum Nervus sexti paris constituerunt.

§. IX.

Nauseosum foret observationes meas omnes ex ordine, prout eas in tot diuersis Cadaueribus annotaui, recitare. Quapropter recedentem a perfectissima, mox narrata, Nerui Accessorii structuram paucis saltem verbis hic subiungam. Filamenta ea (1) quae ad augendum neruum Accessorium a Medulla Oblongata, octauo pari Cerebri primoque Colli interclusa, non semper ita se, vti supra dictum est, & Icone expressum, habere obseruaui. Quandoque eorum pauciora, vel & minus filamentosa sunt; rarius plura vidi; nunquam vero ea prorsus defuerunt. Vt de praecipuis saltem Anatomicis mirandum sit, quomodo haec, tam conspicua, & nunquam non obseruabilia filamenta neruea negligere potuerint. Eorum filamentorum quaedam (ruditer quanquam) distincte tamen depicta exstant apud VIEUSSENIUM (2); de quibus ne verbum profert autor in textu, de Neruo Accessorio agens. In explicatione figurarum (3) vero ea male pro originibus posticis Nerui primi paris Colli habet; a quibus longe quidem diuersa sunt. Cum primus neruorum Ceruicalium duo filamenta pro origine sua accipiat distincta satis, ac diuersa ab iis, ac inferius posita (4). E contra WINSLOWIUS (5) vera filamenta s. originem posticam Nerui primi ceruicalium (quem Infraoccipitalem vocat) pro singularibus filamentis Nerui Accessorii habet, quae ab iis, de quibus nunc sermo est, differunt. Ita quoque SANTORINI (6) fibrae tres, in suprema Medullae spinalis parte sitae, decimo pari (vti loquitur) respondentes, non aliorum quam ad posticas nerui nostri primi Ceruicalium referri possunt; atque adeo & ipsae diuersae erunt a nostris. An forte RYVSCHIVS (7) filamenta a medulla oblongata exeuntia intellexerit, quando de Neruo Accessorio locutus fuit? non dicam. Ecce eius verba. *Obseruo Neruum accessorium non considerandum esse tanquam ramulum eiusdem Nerui, e superiore parte spinalis Medullae*

medullae ortum; per se enim emergit variis radicibus (ut ita loquar) & quidem subtilissimis. Quia vero Autor ea filamenta non exprimi curauit in Tabula eiusdem Epistolae, vbi Nerus Accessorius depictus est, procul dubio intellexerit filamenta, a spinali medulla prouenientia. Certo autem constat D V V E R N E Y - V M (8) filamenta ista Medullae oblongatae perspexisse, cum vnum vtrumque, Neruo Accessorio insertum, nitide exprimi curauit; & alias duo vel etiam tria eorum vidisse asseuerat. Eius verba haec sunt. „*Deux petits filets de Nerfs, qui sortent de la Mœlle, pour s'unir a ces nerfs, qui sortent de l'épine, & qui se joignent a la huitieme paire; l'on trouve quelquefois deux ou trois de ces filets de Nerfs de chaque coté.*

Ego vero constantissime aliquot saltem eorum filamentorum perspexi; quae interdum omnia in Neruum Accessorium desierunt, quandoque etiam quaedam eorum exilissimorum immediate, absque communicatione cum Neruo Accessorio prius facta, ad duram Matrem abeunt, & per eam dispergenda. Non infrequenter quoque vnum vel alterum, exilissimum itidem, filum ab ipso Neruo Accessorio, è regione ingressus filamentorum medullae oblongatae ad eundem Neruum abeuntium, durae matri impertitur (9).

Varietatibus non minus obnoxia sunt filamenta inferiora Nerui Accessorii. Non semper enim primam huius nerui originem adusque filamenta postica septimi paris colli oculis assequi licet. Nunquam vero eam profundius emergentem vidi, nec vnquam vltra ferri puto, saepius autem ad altiora filamenta sexti paris egredientem vidi; aliquoties etiam eam tenui, & arcuato principio, e supremo quasi quinti paris filamentum secedentem, reperi. Hucusque plerumque in tenerrimis etiam Cadauerculis, vix sex mensium, infimam originem assequi potui: Vt neutiquam cum iis facere possim, qui citra neruum quinti paris eum produci volunt (10); pro quibus quae faciat, nec vnicam obseruationem habeo. Non tamen absolute dixero, eum

non quandoque a quarto pari, vel etiam superius adhuc, prouenire posse. Attendendum hic est ad hoc, quod Nerui Accessorii prima origo, exilissima semper, non in omnibus Cadaueribus, altiora petens, crassitie sua augeatur. Quod forte Professoribus occasionem dedit, primam originem altius, quam reuera sit, educendi. Aliquoties enim illam v. gr. ad quintum par prodeuntem, tam arcte filamentis quarti paris, eorumque originibus adhaerentem reperi, & tam tenuem, vt ibi vix conspici posset; cum tamen ad primum exortum magis conspicua esset. Praeterea radiculae illae, quas Nervus Accessorius in via a medulla spinali accipit, non constantes sunt, nec numero, nec loco certo, vnde egrediuntur. Quandoque enim a prima origine adusque trunci ingressum intra caluariam non nisi duas accipit radículas, ad posticorum filamentorum neruorum colli ortum egredientes.

(1) De iis filamentis, quorum WINSLOWIVS l. c. n. 144. & 163. atque SANTORINI *observ. an. cap. III. §. XX.* mentionem faciunt hic sermo non est, quia illa, de quibus hi auctores loquuntur, primo pari colli appropriata sunt, nostra vero altius oriuntur.

(2) *Neurograph. Tab. XX. fig. II. E. E.*

(3) *ibid. E. E.*

(4) *ibid. F. G. insignita.*

(5) l. c. n. 144. & 163. & *Tr. de la Tete n. 160.*

(6) l. c. C. III. §. XX.

(7) *Epistol. Problem. Duodecim. p. 26.*

(8) *Traité de l'organe de l'oïzie. Explicat. Tab. XI. Z. Z.*

(9) Nunquam tamen filamenta ista ad osseam thecam vsque prosequi potui, vt mihi saltem non credibile videatur, ea extra caluariam ferri; sed potius credam, ea in dura matre infumi, eique inferuire. Quod autem vere sint filamenta neruea, non aliud quid, frequens experientia me in iis Cadaueribus conuicit, quorum vasa prius materia ceracea repleueram; quo mihi cauerem ab errore a dextrerrimis quandoque Anatomicis admissio, qui vasa pro neruis habuerunt. Ita celebris disceptatio de vero ortu Nerui Intercoastalis a vase tenui, arterioso, nerueum filum referente, orta est, quod vasculum tali directione, quasi a quinto pari proueniret, eiusque

eiusque propago esset, incedit, ut facile imponere possit Anatomico, nisi materia ceracea repletum est. Omnem Nervi Intercoastalis ambiguitatem atque dubium per accuratissimas suas observationes in planum diduxit celebr. Anatomicus noster, ac Lynceus, A L B. H A L L E R V S. *l. c. Vol. II. p. 564.*

- (10) Ita v. gr. VIEUSSENIVS *l. c. p. 187. & Tab. XX. fig. II. E. E.* illum ad quartum par educit, & CEL. HEISTERVS *Comp. Anat. §. 300.* ad tertium tantum, vel quartum; quod secundum nostram numerationem sine dubio erit quartum vel quintum par colli.

§. X.

Paucis jam praecipuorum Anatomicorum sententias explorabimus. Quid RIDLEYUS (1) viderit? quando Nervi Accessorii originem ab anterioribus ac posterioribus Nervi Cervicis septimi paris initiis educit; sane non intelligo. Haec a naturali recedens RIDLEYI descriptio jam SANTORINUM (2) excitavit, quaedam ut regereret, qui secus rem se habere evidentissime deprehendit, nec paucis verbis id probavit. Quia vero SANTORINI ne verbum quidem de ligamento denticulato, bina nervorum principia intersepiente, omnemque controversiam tollente affert, addam heic semel adhuc, Ligamentum denticulatum parietem, inter Nervum Accessorium (in quantum iter suum cum medulla spinali facit) & principia nervorum vertebralia antica intercedentem constituere, qua omnis communicatio, prout oculorum testimonio constat, Nervi Accessorii cum principiis s. filamentis Nervorum Cervicalium anticis interclusa, & intercepta est.

(1) *Anatom. Cerebr. Cap. XVI.* spero tamen translationem latinam huius libri non bene se habere. Anglicae editionis copia mihi non est.

(2) loco supra allegato C. III. §. XX.

§. XI.

Tenuis huius Nerui origo prima, eiusque non rara varietas dissenfum inter Anatomicos Celebratissimos peperit, & adhuc parit. Ipse eapropter MORGAGNIUS dicit, (1) se huius Nerui inferiorem partem adeo tenuem obseruare consuevisse, vt propterea circa eum, quo cum medulla iungatur locum, neque VERHEYENI silentium, neque aliorum dissenfum miretur. Propriam autem de vera huius Nerui origine opinionem vel obseruationem non affert MORGAGNIUS, sed rem sicco pede transit. Praeterea WINSLOWIUS cum DRAKIO (2), plurimisque aliis primam originem Nerui Accessorii ne verbo attingit; cum omnes fere solum de eius ingressu intra caluariam, ac combinatione cum octauo pari solliciti sint (3). Non pauci alii WILLISII enarratione (4) acquiescunt, & non eius fide solum, sed verbis adeo seruatis Neruum illum iuxta sextam vel septimam Ceruicis Vertebrae à medulla spinali egredi contendunt.

VIEUSSENI descriptione (5) huius Nervi, comparata cum Icone eius, & sic demum completa, omnium optima est, in eo modo deficiens, quod primam eius originem non profunde satis, sed ad quartum (6) modo par exeuntem tradidit, cum ea ordinario ultraferatur. BIDLOVS autem dicit (7), hunc Neruum (ab eo per excellentiam *Spinalem* dictum, & tamen pro decimo Cerebrali quoque numeratum) inter sextam vel septimam ceruicis, imo primam dorsi vertebrae originem petere. Eodem fere modo se habet RIDLEYI obseruatio (8) de prima origine ad septimum Par Ceruicalium, quod, secundum nostram Neruorum enumerationem, minimum ad octauum par, si non ad primum dorsale esset. Cum RIDLEYVS de decimo pari, inter primam & secundam Vertebrae colli, secundum eius mentem, exeunte non decidat, an ad Nervos Vertebrales pertineat, nec ne; sed rem in
su-

suspenso relinquat. Ego vero supra pro termino, quem prima radix non transgredi solet, septimi paris filamenta suprema posui; prout autopsia aliquoties conuictus fui, nec unquam eam originem ultra profequi potui. SANTORINI nunquam huius Nerui originem ultra quintam Neruorum Ceruicis coniugationem prodeuntem obseruauit, (9) sed citra eum locum. In quantum haec SANTORINI obseruatio a nostris, saepies repetitis, discrepet, ex praemissis elucet. Doleo nunc, quod VALSALVAE opera, ex recensione MORGAGNI Venetiis nupere prodita, (10) nondum ad manus nostras peruenerunt, quo VALSALVAE de his rebus obseruationes cum nostris comparare possim.

Neruus iste, hucusque traditus, Accessorius WILLISII appellari solet, quia plerique Anatomici putarunt, a WILLISIO primum obseruatum esse, atque descriptum; cum tamen ea laus magno EVSTACHIO debeatur. RIDLEYVS (11) dicit, VIDO VIDIO iam pridem ante WILLISIVM eundem Neruum visum, delineatum, ac descriptum. Hoc tamen non aliter intelligendum esse censeo, (quod bona pace RIDLEYI dictum esse volo) quam in quantum Neruus iste in VIDI VIDII opere posthumo figuris expressus est. Equidem nullam usquam factam eius mentionem reperire potui in ipsis VIDI VIDII verbis. Et quia ne vestigium quidem huius Nerui apud FALLOPIVM inuenio, quem VIDVS VIDIVS in omnibus fere verbotenus sequitur, in quantum VIDO VIDIO cognitus fuerit Neruus ille, non facile est iudicare. Attamen in Tabulis eius bis expressus occurrit Neruus ille ad octauum par Accessorius, qui semel tantum caractere designatus & in explicatione indicatus est (12). Convenientissimam vero, & appropriatam satis, huius Nerui descriptionem, diu ante WILLISIVM, & longe prius, quam VIDI VIDII opera publici iuris facta sunt, traditam reperimus apud VOLCHERVM COITER (13), cuius verba omnino hic recitari merentur, & haec sunt „*Sextum* (quod octauum par est recentiorum)

etiam par conflatur a coacervatione plurimarum fibrarum, quae a spinali medulla maiori ex parte, iuxta quintam colli vertebram visae sunt primo prodire, & in ascensu multis aliis fibris augeri, atque ita inter filamenta spinalis medullae superiora inferioraque nervos constituentia, sursum tendere, quoad cum septimo (14) pari proprium transmeent foramen. Recentiorum Anatomicorum nullus tam exactam dedit totius Nerui descriptionem, uti hic etiam praedicanda sit COITERI industria. Omnium autem primus fuit BARTHOLOMAEVS EVSTACHIUS, qui hunc Nervum vidit, breviter saltem, alia agens, indicavit, & Iconibus expresit. In *Examine ossium* ita de eo loquitur (15) *Excitare te Nerui etiam debebant, nam ut mittam nunc illos qui - - ac tres quoque propagines sexti iugi Nervorum Cerebri a medulla spinali principium sumentes* (16); dein in Tabulis suis accuratissimis eundem Nervum ter curavit exprimi (17).

(1) *Adv. An. II. anim.*, XXXVI.

(2) *Anthropologia*.

(3) Quam parum plerique Anatomici curauerint veram huius nerui originem noscere, eiusque multifarias radículas, ex parte dictum iam est; & porro constat ex CEL. HEISTERI allegatione *l. c.* §. 300. cum ibi ad indicandam optimam huius nerui figuram, mutilatam DVVERNEYI allegarit. Cum tamen VIEUSSENII Icones sint longe optimae, minus quamvis nitidae.

(4) Quam varians vero ac diuersa sit WILLISII descriptio, ex diuersis locis, ubi de hoc neruo agit, euincere opus esse mihi videtur, primo enim ortum eius obscure tradit, nec satis eum determinat. *Anat. Cerebr. Cap. I. p. m. 7, edit. Amstelod. 12.* & hunc nervum *p. 131.* alterum octauum paris, maiori trunco praeditum, appellat, ab extremitate medullae oblongatae, vel e spinali Medulla productum: ibidem paulo inferius nervum illum absque ulteriori descriptione *spinalem s. accessorium ad par octauum* appellat. Et *p. 183.* rursus dicit *neruo octauum paris accedere fibram insignem s. nervum potius a spinali medulla, & tandem omnem eius historiam accuratissime absolueret videtur Capite XXVIII.* ab initio, priora omnia repetens ac porro addens „Itaque si nerui huius principium indagare velimus, illud in latere spinalis medullae cum acuta cuspide incipiens, iuxta sextam aut septimam

septimam ceruicis vertebram deprehenditur fig. 12. C. C. Et tamen autor neruum illum in eadem citata *Tab. XII. C. C.* a quinta vel sexta Ceruicis vertebra educit; ac demum *p. 238.* illum neruum cum frutice super aliis fruticibus accrescente comparat, nullibi peculiarem originem habente.

- (5) locis mox citatis.
- (6) Quod secundum nostram quoque enumerationem est par quartum.
- (7) *Anatom. C. H. Tab. 9. fig. 1. h.*
- (8) loco & capite allegato.
- (9) *l. c. §. XX.* Quintum par colli, de quo hic autor loquitur, erit procul dubio sextum nostrorum; quia SANTORINI ibidem de Neruo Accessorio agens, decimi paris mentionem facit; quod quoque ibi seorsum numerandum erit; quanquam §. XXII. decimum par ad Nervos Colli referat.
- (10) Vti intellexi ex *novellis litterariis Lips.*
- (11) *l. c.*
- (12) Semel *Tab. XVIII. fig. II. *. ** cum hac explicatione „*duos ramulos, qui a radice medullae orti, augent sextum par,*„. Dein quoque conspicitur *Tab. LXXVII. fig. XV.* absque insigniente caractere appposito. Haec sunt quae apud VIDVM VIDIVM de hoc neruo, reperiuntur.
- (13) *Observat. p. 107. & 108.*
- (14) Hoc sine dubio est error typographicus, cuius loco legendum est *sexto.*
- (15) *Vid. eius opusc. edit. Venet. p. 227.*
- (16) Quid autem moverit LANCISIVM vt haec verba aliter interpretaretur, eaque ad originem ipsius Nerui octavi (quod sextum est Veterum) paris referret in explicatione *Tab. Eustach. XVIII. fig. II.* non comminiscor. Grauiissima sine dubio fuerunt LANCISII negotia, atque curae maximi momenti ac frequentissimae. Si tamen paululum attentior fuisset in edendis Tabulis illis, non praeterire potuisset Nerui Accessorii supremam partem, in eadem fig. II. neruo octavi paris, triplicibus quidem originibus constante, accedentem vtrimque. Sed optimus EVSTACHII verborum interpres sunt *Tabulae eius XVIII. fig. I. & III.*
- (17) Videatur *Tabulae XVIII. fig. I. II. & III.* vbi *fig. I. & III.* totus nervus triplici sua origine expressus conspicitur optime. Cum haec res per se clare eluceat, non opus erit interfecantium linearum puncta determinare ad indicandos hosce nervos; prout alias Tabulae EVST. requirunt.

§. XII.

Quomodo Nerui illi, a WILLISIO aliisque pro decimo pari Cerebri habiti, ad nostram de spinali medulla, eiusque Neruis pertractationem pertineant, mox patebit ex eorum structura: de qua quidem famigeratissimi Anatomici multum sibi contrariantur, a paucissimis vero ea bene tradita est. Sed horum Neruorum tenuitas, variabilis natura, & aditus ad eos difficilis eos eluisse videtur, quo minus veram eorum, duplicem nempe originem detexerint. Atque vt verum fatear, ego etiam aliquoties hos Nervos simplices, ab antica solummodo illos medullae facie prodire, annotavi, & ita se habere putavi, usque dum nactus exoptata facultate, plusquam vigesies nupera hyeme in hos nervos in Cadaueribus humanis inquirendi, in encheiresin incidi, eos aequae ac Nervum Accessorium quam commodissime exactissimeque administrandi (1).

Nervus iste, vel potius quivis eorum, *duplici* constat, in utroque latere, *filamentorum serie s. principio*, distincte, & constantissime, reliquorum nervorum spinalium instar, ab antica alia, alia à postica Medullae spinalis facie egrediente (2). Filamenta *antica* ad aliquot lineas infra & vix intra ea noni paris oriuntur, vno semper altero altiori, arcte tamen sibi adplicata, & ita continuam cum subsequenteribus nervis vertebralibus seriem efficientia. Numerus eorum non semper idem reperitur, in aliis duo, vel tria, plerumque tamen quatuor, etiam quinque adsunt tenuiora, in duas chordulas plerumque confluentia, priusquam foramen suum attingunt. Ex infimo horum filamentorum frequentissime, non semper tamen, filum tenue oblique deorsum & extrorsum secedit, communicans cum filamentorum secundi paris supremo. Talia fila communicantia Nervis cervicalibus frequentissima sunt. *Postica* aliter se habent, frequentioribusque varietatibus obnoxia sunt (3). Sed plane nunquam deficiunt. Plerumque duo non exilia filamenta a postica, fereque

fereque media, vti reliqua neruorum Ceruicalium, medullae spinalis facie siue Virga prodeunt, sibi arcte applicata, filamentis anticis ex opposita facie respondentia, paulo tamen notabilius spatium infra se atque vicini nerui filamenta relinquunt. Ordinario haec filamenta vt priora ab ortu ad foramen suum osseum libere excurrunt; pone tamen Neruum Accessorium decussatim extrorsum feruntur. Rarissime unica tantum chordula, ex aliquot tenuissimis filamentis conflata, hanc posticam originem efficit. Et postica haec origo plerumque etiam filo, communicante cum subsequente neruo, gaudere solet; imprimis quando ea absque immistione cum Neruo Accessorio iter suum facit; Quando vero aut gangliolum, vti dictum est, cum eo efficit, aut tota cum eo in communem truncum abit, tunc absque vlla communicatione cum Neruo vicino reperitur. In priori itaque casu frequenter, nec tum quidem semper, haecce origo posterior filum dimittere solet gracile, extrorsum deorsumque excurrans, & supremo filamentum, quo cum exit, secundi paris ad oppositam directionem filamentum illius, a secundo pari ad Neruum Accessorium abeuntis, iunctum; vt bina haec filamenta se decussent.

In eo tantum differunt filamenta postica a prioribus quod non semper libere foramen suum adeunt, & quod paulo (3) angustiora iis sunt. Varietates & commistiones, quas non raro facit origo ista posterior cum Neruo Accessorio, heic repetere nolo, quia de iis fuisse iam actum est paragrapho octava.

Hae binae origines, s. filamenta priora & posteriora, infra tumentem oram ossis occipitis, vtcunque e regione foraminis arteria vertebralis e medulla spinali exeuntia, distincta, & absque commistione, foramen durae matris subeunt; priora ante arteriam, posteriora pone & paulo infra illam. Ac demum intra foramen ante ac fere infra arteriam in communem truncum coeunt: siue iam origo posterior ex ganglio, §. VIII. indicato, accedat, siue immediate e medulla huc fe-

ratur, semper dictum in modum communis truncus generatur, ibi aliud ganglion (4) efficiens; quod neque extrathecam vertebrarum, neque intra illam conspici potest, in proprio sinulo (5) s. fulco primae vertebrae & basis ossis occipitis, in eius atque arteriae vertebralis gratiam excludito, iacens. Hinc etiam conspici nequit, nisi diffracto caute osse occipitis, integra relicta vertebra. Quo facto demum in conspectum venit arteria, Nervum fere obtegens, & ea semota demum ganglion integrum, in inferiori & laterali (6) fulci parte leniter incurvatum iacens, & ad marginem externum condyli articulatorii usque porrectum se prodit. Quandoque tamen in iunioribus Cadauerculis vix ganglii speciem ibi induit Nervus iste, sed tenuis admodum, absque conspicua saltem gangliiformi intumescencia, fereque aequalis per sulcum suum fertur; nunquam vero aliam sibi viam facit.

Quamprimum Nervus iste e foramine suo egressus est, in duos finditur ramos (7), quorum alter maior extrorsum & postice ad os occipitis fertur, communicans cum ramulo subsequents paris; alter, vix minor, in proprio sulco suo, in exciccata vertebra optime conspiciendo, intra primae vertebrae processum transversum, ac condyli articulatorii marginem externum arcuatus antrorsum tendit, & statim furculum vel accipit a secundo pari ad eius egressum, vel dat illi, arcumque cum eo facit reticulatum. Ex hoc arcu furculi egrediuntur aliquot, exterior eorum ad Nervum noni paris eo praecise loco, vbi Nervus octauus, nonus, & Intercostalis Nerui ganglion supremum colli, vna quasi membrana neruea arte sibi inuicem adnectuntur, excurrit, & quandoque ganglio Nerui Intercostalis immisceri videtur (8). Alius furculus, interior & posterior, cum arteria Carotide interna adusque eius curvaturam, extra cranium, constantissime repertam, adscendens dat tenuissimos furculos musculo Recto, & in quatuor tandem filamenta fissus in summo Musculo

culo Longo colli evanescit. Et ne iudicium nostrum de furculo illo, arteriae & venae vertebralibus se adiungente, & per foramina vertebrarum cum iis, secundum mentem LANCISII atque WINSLOWII, descendente (9) suspendere videamur, malo heic ingenue profiteri, me illum, satis exacte multoties quanquam in eum inquisiuerim, nunquam inuenisse. Unica tantum vice tenuissimum filum, ibi se demergens, obscure perspexi, quod, si quid fuit, non ultra ganglion Nervi secundi paris penetrauit, sed in eo evanuit. Sed vt aperte loquar, non possum cum iis facere, qui adhucdum persuasum habeam, nihil tale adesse, a Neruo primo decedens, & cum vasis vertebralibus se demergens. Quamprimum vero mihi opportunitas data erit, pro lubitu, & in proprios usus minutissimas Corporis nostri partes rimari, omni tunc cura atque diligentia ultra in hocce filamentum absconditum inquiram, & quidem in Cadaueribus adulatorum, quae subtiliorem structuram investigantibus sunt accommodatiora.

(1) Quae in fine §. XVI. tradita est.

(2) Filamenta *antica* omnibus Anatomicis nota sunt, plerique vero ex iis solis nervum constitui putarunt, ac adhuc putant. De *posticis* autem pauci cogitarunt. Quando enim Veteres de duplici huius nerui propagine, postica & antica s. de duplici eius exortu, vel initio loquuntur, non constat, eos vera principia, e medullae spinalis diuersa facie prodeuntia, intellexisse; Interim tamen MOSTELIVS duplices origines, distinxisse videtur, ita dicens in *synopsi nervorum*, „primum par dorsalium (s. vertebralium) nervorum utrimque duos habet exortus, ac alteram propaginem offert posteriori, alteram anteriori sedi corporis. Posterior propago procedit a spinali medulla, ubi natura efformavit foramen in articulatione primae vertebrae cum osse occipitis - - . Anterior propago est gracillima & non semper conspicua enascitur ab anteriori dorsalis medullae regione, & prodit intra primam vertebrae & occipitis os. Ex his verbis suspiceris, quasi veras origines traderet Auctor, satis bene distinguens inter exortum e medulla ipsa atque exitum e spina. Simili fere modo hunc nervum describit SPIGELIVS de H. C. fabr. p. 194. ed. Amst. Attamen VESALII, Vetusiorumque Anatomicorum verba (vti ex INGRASSIA quoque patet in Galen. de ossibus p. 169.) non nisi ad ramificationes tantum referri possunt.

(3) De quibus varietatibus egimus §. VIII.

(4) Cuius mentionem quoque facit WINSLOWIVS *Tr. de Nerfs n. 159.*

(5) VESALIO, MOSTELIO *l. c.* REAL. COLUMBO *de Re Anat. p. 51. edit. Venet.* PH. INGRASSIAS *de ossibus p. 165.* aliisque iam cognitus fuit iste sulcus. Optime tamen a VESALIO *de H. C. fabr. edit. Bas. 1555.* descriptus est pag. 78. & 534, figuris quoque ab eodem expressus est *L. I. Cap. XV. fig. I. litt. H. ibid. fig. 3 & II. litt. V.*

(6) Non tamen plane infra arteriam repit, vti vult WINSLOWIVS *l. c.* & ex eo GARENGEOTTVS *Splanchnolog. p. 488.*

(7) Quod eleganter expressum est in VESALII *operibus L. IV. C. XI. fig. III. F.*

(8) Immisionem illam cum ganglio Nerui Intercoastalis cum aliis Anatomicis veram agnoscit CEL. HALLERVS *l. c. Vol. II. p. 565.*

(9) Quum LANCISII mentem non satis assequi potuerim, an furculum nerui decimi paris intelligat; an vero singularem neruulum, a spinali Medulla pone decimum neruum ortum, malui eius verba hic repetere, ex libro *de Motu Cordis & Aneurism. p. 75. edit. Rom. desumpta.*
 „Tertius (Nervus sc. Cardiacus) seu vertebralis intra cranium (quod notandum) prope par decimum oritur, multisque eiusdem ramis comitatus incedit per canalem exsculptum ad excipiendam arteriam vertebralem, ibique non paucis uernorum fibris, e spinali etiam medulla profectis locupletatus egreditur, ex septima colli vertebra, ibique in secundum ganglium (nerui sc. Intercoastalis) abit.“ Quid iam intellexerit LANCISIVS per huncce Nervum Cardiacum, non facile est dicere. An forte originem posticam Nerui primi paris Cervicis, absque communicatione cum antica eiusdem, singularem trunculum efficientem, intellexit? An potius ramum dicti nerui? Quidquid sit res admodum singularis est; equidem nullum nervum tali modo incedere vidi; quoad eiusdem nerui exitum autem ad sextam vertebralem res minus difficultatis habet. Quis enim hodierna luce ignorat, Nervum Intercoastalem furculum accipere ab ipso Neruo sexti paris Cervicis, a septimo, atque ab aliis. Et id ipsum filamentum nerveum, a sexto vel septimo Neruo Cervicis secedens, & neruo Intercoastali immixtum, erit procul omne dubium notabilis ille LANCISII nervus. WINSLOWIVS autem *l. c. n. 159.* clare & aperte loquitur de furculo aliquo a Neruo Infraoccipitali excurrente, & cum arteria & Vena Cervicalibus descendente. Ac tamen brevior est auctor quam rei novitas, ac structurae singularitas exiget in describendo eo neruo; ac porro illi finem assignare nescit, nec eum per interstitium aliquod vertebrarum rursus exire asserit vti LANCISIVS. His omnibus, quae ab utroque scriptore dicta sunt, combinatis,

natis, & cum his, quae observare & inquirere potuimus, comparatis, neque a LANCISII neque a WINSLOWII parte esse possumus.

§. XIII.

Perpendamus iam paulisper, quo Nervus mox descriptus proprie pertineat; Et quo iure ad Nervos Cerebri a WILLISIO eiusque Sectatoribus referri potuerit; & quid inde mali obortum sit; Deinde quid de eius inter nervos Cerebri nervosque Medullae Spinalis ambiguitate sentiendum; tum quantum etiam Autores de eius origine atque progressu discrepent; & tandem, quinam de vera eius & duplici origine cogitarint.

Ex Nervi huius descriptione, §. XII. a vero non recedente, atque ex allegatis in §. VI. Nervorum Cerebri atque medullae spinalis proprietatibus, ac differentiis inter eos intercedentibus, unicuique evidentissime patere confidimus, quo iure referri debeat, nec aliter possit, ad Nervos Vertebrales: Vtpote qui nulla proprietate, Nervis Vertebralibus competente, non gaudeat; & e contra iis omnibus, quae sunt Nervis Cerebri familiaria, careat. Cum 1^o duplici origine constet. 2^o Ganglion suum habeat ad egressum ex theca ossea. 3^o per hiatum vertebrae suae exeat. 4^o oriatur ex ipsa medulla spinali. Ac porro ad roborandam sententiam nostram, tuendamque eam faciat 5^o filamentum communicans cum Neruo subsequente, quandoque in vtraque facie simul conspicendum; quae communicationes solis Nervis Ceruicalibus familiares sunt. Erit itaque, nemine forte in posterum contradicente, cum antiquissimis Anatomicis (alia quanquam ratione commotis) *Primus Nervus Ceruicalium* appellandus. Sententiam hancce maxime roborare quoque debent observationes, atque argumenta magni Viri ALB. HALLERI (1); ita de eo praemissis observationibus loquentis: „Videtur omnino

„adnumerandus Ceruicalibus, tum ob duos, quos cum vici-
 „no arcus facit, similes aliis Neruorum ceruicis arcubus, tum
 „ob insertionem in nonum & Intercoftale Ganglion, quam &
 „alii colli Nerui habent, denique ob radices duplices. „Vnde
 patet, Neruum hunc, quem prius (2) inter Nervos capitis
 & spinæ ambigere dixerat, Nervis Vertebralibus ab illo an-
 numerari. A WILLISIO (3) pro *Decimo pari Cerebri* habi-
 tus fuit. Aliis ob suspectam ambiguitatem aliter placuit; un-
 de I. M. HOFFMANNUS (4) eum *Cervicis motorium* s. *Occipi-
 talem* vocavit; Ex quo forte BIDLOUS (5) eum *Occipitalem* Ner-
 vum appellavit. WINSLOW (6) ei nomen *Nerui Infraoccipi-
 lalis* dat. Ante WILLISIUM ab omni tempore *primus Cer-
 vicalium* fuit. Quid iam WILLISIUM commouere potuerit,
 vt Neruum istum contra receptam docendi consuetudinem
 Nervis Cerebri iungeret, non video; Cum verameius origi-
 nem viderit, etiamsi ne verbum de duplicitate eius afferat;
 dicit enim (7). „*Infra hoc (nonum par sc:) in postremo occi-
 „pitio e medullae oblongatae, iam in spinalem cessurae, lateribus,
 „par aliud, fibris, etiam multis constans, exoritur: quod ver-
 „sus medullam spinalem tendens, duram matrem eodem loco subit,
 „ubi arteria Vertebralis in cerebrum ascendit; hactenus bene;
 iam vero insequitur eius lapsus, cum pergit „attamen ex osfi-
 „um finibus non nisi infra primam vertebra emergit.* Si nunc ver-
 ba priora cum figura 1^a O. O. conferuntur, nihil aliud colligi
 poterit, quam, WILLISIUM optime perspexisse veram, du-
 plicem (quam equidem non expresse ita appellavit) huius Ner-
 vi originem, intercedente Neruo Accessario. In eo tantum
 aberravit, quod eius transitum per thecam osseam ob Nerui
 tenuitatem, atque egressum, e regione perforationi durae ma-
 tris non respondentem, cum subsequente Neruo confudit, &
 sic ortum prioris cum egressu alterius male combinavit. Hunc
 WILLISII lapsum DUVERNEY iam dudum indicavit (8).
 Sed error iste WILLISIO facilius condonandus est, qui magnis
 illum

illum meritis redemerit, & ista forte non adhibito animali exemplo scripserit. Illos miramur, qui vel illum potius, quam naturam ducem sequi maluere, vel illius errorem de transitu observationibus nescio quibus firmarunt, quarum fidem apud me non suspectam reddunt, sed plane euertunt, tot experimenta: Nisi putamus aut hoc tempore, aut sub hoc coelo, alia nasci corpora hominum, quam aliàs. Nempe magnum etiam HOMERUM dormire nouimus. Non MANGETTUS (9) solus hic hallucinatus est, sed humanam conditionem passus est peritissimus dexterrimusque Anatomicus HEISTERUS (10), post RIDLEYUM (11) & alios, Neruo huic transitum inter primam & secundam Vertebra adscribentes: quod hic indicari tanto magis refertur, quo diligentius eorum libri, tanquam classici leguntur. Cautius hac in parte egere ii scriptores Anatomici, qui WILLISIUM in multis imitati, tamen omnino veram Nerui alicuius emissionem inter occiput primamque vertebra agnoverunt. Tales sunt v. gr. VIEUSSENIUS (12). I. M. HOFFMANNUS (13) MOLINETTI (14). S. PAULI (15). THOM. BARTHOLINUS*; aliique plures. Caeterum quanta sit WILLISII Auctoritas vel inde apparet, quod tot praestantes Viri errorem illius, quam Veterum Anatomicorum doctrinam sequi maluere. Qui omnes vno ore a GALENO adusque WILLISIUM Nerui huius in suprema spondyli primi parte egressum (16) & ramificationes, in vnoquoque latere duplices ample & accuratissime tradiderunt; quod longa Auctorum serie probare possem, si vellem; Primarios tamen, vt reliquorum fontes, allegare consultum erit. Sunt GALENUS (17). ALEX. ACHILLINUS (18). I. CARPUS (19). ANDR. VESALIUS (20). NIC. MASSA (21). BARTH. EVSTACHIUS (22). REALD. COLUMBUS (23). VIDVS VIDIUS (24). ARCH. PICCOLHOMINEVS (25). PH. INGRASSIAS (26). ADR. SPIGELIUS (27). IOH. RIOLANVS F. (28). &c.

- (1) *Commentar. in Boerhr. Vol. II. p. 568. & 569.*
- (2) *ibid. p. 519.*
- (3) *Anat. Cerebr. Cap. XXIX. p. 254.* eum ita appellat, atque in *Explicatione Fig. 1. & 2. O. O. 5. P.* (de 6. fig. N. N. non conuictus sum an reuera decimum par sit. annon forte nonum est?) & in aliis locis; Attamen WILLIS ipse ab initio tractationis s. libri huius p. 7. dubitauit, vtrum nervus iste vltimus Cerebri an Ceruicalium primus appellari debeat.
- (4) *Idea Mach. hum. p. 262.*
- (5) *Anat. Corp. H. Tab. 9. K.* praeterea quoque secundum BIDLIOI enumerationem nervorum Cerebri, nervi eius occipitales duodecimum s. vltimum par Cerebri constituunt.
- (6) *Trait. des Nerfs n. 154. 163. & Tr. de la Tete n. 147.*
- (7) *l. c. p. 7.*
- (8) *Traite de l'organe de l'ouïe p. 44. Edit. Lugd. Bat. & Tab. XI. R. R.*
- (9) *Theatr. Anat. T. II. p. 320.* vbi nervum istum RIDLEYI verbis describit.
- (10) *Compend. Anat. edit. vlt. T. II. p. 132.* Nescio qualem Auctor WILLISII operum editionem consuluerit, cum WILLISII sententiae accedit, quem tamen impugnare & contrariari cuperet.
- (11) *De Cerebr. Cap. XVI.*
- (12) *Neurogr. p. 212.*
- (13) *loco mox allegato.*
- (14) *Diff. Anat. Pathol. p. 202.*
- (15) *apud. van HORNE Opusc. p. 181.*
- * *Anatom. renou. Libell. III, Cap. III.*
- (16) Hic non attingimus GALENI & quorundam insuper Veterum erroneam sententiam de transitu huius nervi per proprium foramen, in ipsa primæ Vertebrae substantia ossea exsculptum, de hoc agitur in fine §. XXIX.
- (17) *De usu Part. L. XIII. C. 3. edit. Iuntar. nona. Class. I. p. 199. b. & ibid. c. 5. p. 200. b.* Et AVCTOR libri de *Anatom. Viuor. Galeni oper. Spur. p. 54. b.*
- (18) *Annotat. Anat. p. XV. b.*
- (19) *Comment. in Mordin. p. CCCCLXXXII. b. & CCCXCIX. b. item Isagog. Anat. p. LXIII. ed. Bonon.*

- (20) *De H. C. fabr.* p. 78. & 535.
 (21) *Anatom. Libr. Introd.* p. 101.
 (22) *Exam. off. opusc.* p. 211. & 214.
 (23) *De Re Anatom.* p. 51. & 201. edit. Venet.
 (24) *Anatom C. H.* p. 96.
 (25) *Praelect. Anat.* p. 265.
 (26) *De Ossib.* p. 169.
 (27) *De H. C. fabr.* p. 194.
 (28) *Anthropol. L. V. C. XLIX.*

§. XIV.

Quid autem post WILLISIIUM factum est, cum quidam Veterum sententiam reiicere non possent, & WILLISIO contradicere nollent? Maius malum.

Decem ab iis numerabantur paria Neruorum Cerebri, eademque depicta exhibebantur, quibus subsequiebantur paria medullae spinalis triginta, connumerato iis decimo pare Cerebri. Hinc vnus idemque Neruus duobus nominibus, Cerebro semel, & medullae spinali rursus attributus fuit. Primus (ni fallor) magni huius erroris fons, occasionem dante WILLISIO, latet in magno VIEUSSENIi opere (1), vbi dicit „*Nerui decimae coniugationis, quorum radices iuxta infimam corporum pyramidalium & oliuarium partem collocatae tribus tantum fibrillis (quae tabula XIV. & XV. exprimuntur) constant, sicut & noni paris Nerui e tractibus albis e media oualis centri regione eductis prodeunt, & caluariâ inter os occipitis & primam Cervicis Vetebram egressi, sursumque reflexi. &c.* Haec descriptio optime se habet, & veram Nerui naturam exprimit; ibi demum error subest, quod Auctor filamenta ista duobus filamentis posticis (Tab. XX. f. II. F. G. indicatis) non combinavit ad constituendum unum neruum; sed posticis primi paris, citatis, antica secundi paris, Tab. XX. f. III. I. I. indicata (quae male

E

pro

pro primi habet) iunxit, & veram originem anticam pro nervo decimi paris habuit. Quando autem postea (2) de nervis spinalibus, (quos omnes ob duplicia principia ita apellant) loquitur, transitum eorum per interstitia vertebrarum ne verbo quidem attingit, & septem tantum collo paria adscribit. Quod autem primus eorum necessario debeat esse idem Nervus supra descriptus, decimus Cerebri, manifesto apparet, si audiantur sequentia verba Auctoris (3) „*inferiora tria ipsorum* „(nervorum colli sc.) *paria, una cum paribus duobus superiori-* „*bus Nervorum dorsalium in Nervos brachiales desinunt.* Nemo iam fateri non debet, infimam brachialium nervorum radicem constantissima lege naturae a nervo, intercapedinem primae & secundae vertebrae dorsi perforante, provenire. Si ergo nonum par nervorum spinalium superiorem hiatum vertebrae secundae dorsalium subit, primum par per hiatum superiorem primae vertebrae, respondentem hiatui ossis occipitis, egredi ex natura horum nervorum sequitur. Vt iam satis de duplici eiusdem Nerui numeratione constare mihi videatur, ad id saltem attendendo, quod Auctor *anticae* huius nerui (sive iam illum decimum Cerebri sive primum Vertebraliū appelles, nihil intererit) origini nomen *decimi Cerebri* induit (4) & *posticam primum Vertebraliū* appellavit (5). Ad rem nostram quoque facere maxime puto, porro indicare illud, quod VIEUSSENIUS omnem attentionem, in disponendis Nervis istis, non adhibuit; & in alterum extremum lapsus fuit, cum veram noni paris Cerebri originem, (ex quatuor plerumque filamentis satis natabilibus constantem, & raro aliter quam ab vno latere duram matrem binis distinctis foraminibus peruadentem) (6) divisit, & *unam* pro nono nervo, *alteram* pro decimo exhibuit (7). Quod eadem Auctoris Tabula, decima nempe septima, ubi in hunc lapsum incidit, euincit, ubi verus Nervus decimus, infra occiput cum arteria Vertebrali exiens, vti fere ab ipso WILLISIO (8) expressus est, pro primo Ceruicalium indicatus

tus est, vt nihil aliud concludi possit, quam illud, (quod quidem praeter naturam est) decimum Neruum ac nonum in hac Tabula esse vnicum neruum noni paris. Vt dicta haec de VIEUSSENIO clariora fiant, aliquid non nimis facile suscipere necessitas, & argumenti ratio me vrget (*9*), nempe Icones aliquot aliter, quam ipse Auctor facit, explicare & illustrare; vbi hoc ante omnia ponimus, decimum Neruum Cerebri primumque colli esse vnum eundemque Neruum, & à nobis primum colli appellari. Erunt itaque fibrae tres in Tabula XIV. K. K. & Tab. XV. origo antica primi paris Ceruicis. In Tab. XVII. Y. Y. & Z. Z. simul sumpta erunt filamenta noni paris, per duo in vtroque latere distincta foramina durae matris exeuntia. Et 4. 4. ibid. erit idem Nervus cum K. K. Tab. XIV. & cum F. G. Tab. XX. fig. II. In Tab. XX. fig. II. litt. F. & G. cum interposito I, (quod deberet esse numerus I.) sunt filamenta postica primi paris colli, quae coniuncta filamentis Tab. XIV. K. K. vnum neruum efficiunt. Et Tab. XX. fig. III. I. I. sunt filamenta postica secundi paris; quod nerui crassities, totius medullae longitudo, & comparatio cum fig. II. docet. Etiam si Auctor harum Tabularum aliter de his partibus sentiat, certo tamen persuasum habeo, litteris, à me explicatis, eas partes designari, quas dictum est. Forte VIEUSSENIUM longi laboris taedium subiit, vel quocunque sculptoris, aut cuiuscunque errore male Icones explicatae sunt.

Multo autem magis aberravit VERHEYENVS, decimum par Cerebri, ex WILLISII Iconibus mutuatum, in propriis Tabulis exhibens (*10*), illudque WILLISII verbis describens (*11*); Cum alio dein loco (*12*) primum par neruorum Cervicalium ex Vetustioribus Anatomicis, haesitante quamuis lingua, traderet. Interim tamen mirifica est haecce binorum illorum parium neruorum descriptio atque sententia, secundum quam ultimus Nervus Cerebri inter primam & se-

cundam Vertebrae colli exiret, primus vero neruorum Cervicalium inferiorem marginem ossis occipitis subiret.

(1) *Neurogr. p. 212.*

(2) *ibid. L. III. C. VII.*

(3) *ibid. p. 214.*

(4) *Videatur eius Tab. XIV. K. K.*

(5) *Tab. XX. fig. II. G. G. (sive potius I. I.)*

(6) Vti patet ex *Icone nostra II.* & quod MORGAGNIUS *Adu. An. VI. anim. XXXII.* alique iam annotarunt.

(7) *Tab. XVII. Y. Y. Z. Z.*

(8) *l. c. Tab. V. P. P.*

(9) Quod MANGETTUS in *theatr. Anat.* potius praestare debuisset, quam haec omnia fideliter servare, & intacta absque vlla admonitione recudere.

(10) *Anatom. C. H. Tab. XXIV. fig. 4. & s.*

(11) *ibid. Tract. IV. C. VI.*

(12) *ibid. Tr. VII. C. VI.*

§. XV.

Sed operae pretium videtur, ad expediendam Nerui huius historiam, Professores illos, omni in re anatomica laude dignos, audire, qui, ob occultam, sibi ignotam, originem huius nerui posticam, eum inter nervos Cerebri eosque Medullae spinalis ambigere dixerunt. Hinc non placuit CEL. MORGAGNIO (1), hunc nervum pro Cervicalium primo connumerare, tum ne receptam, vti dicit, hac aetate docendi consuetudinem turbaret, tum etiam quia non, vt spinalia paria, antico, posticoque principio instructus sit. Ita & CEL. WINSLOW (2) easdem ob rationes noluit, illum ad Vertebrales referre, ab egressu vero atque usu eius maluit illum Infraoccipitalem

talem vel decimum Neruum Cerebri vocare, quam Vertebra-
 lium primum. Scilicet, nescio quo fato accidit, vt tantus Ana-
 tomicus non exactius ac pluries inquisiuerit in veras huius
 nerui origines; Suboluisse illi certe debebat origo postica,
 quam reuera viderit, atque in diuersis locis descripserit. Sed
 eam pro aliis filamentis, Neruo Accessario dicatis, habere ma-
 luit, quam contra totum Anatomicorum chorum pro altera
 origine Nerui sui Infraoccipitalis agnoscere. Ita de iis loqui-
 tur (3) *Chacun de ces deux Nerfs Accessoires etant monté au des-
 sus de la premiere Vertebre, s'attache derriere le Ganglion du
 Nerf Sou-Occipital, ou Nerf de la dixieme Paire; & ayant reçu
 au dessus de cette attache deux Filets de la Portion posterieure de la
 Moëlle, il s'en separe aussitot pour continuer sa route en haut. J'ai
 trouvé ces deux filets, sans communication avec le Ganglion, ni avec
 le Plan anterieur; de sorte qu'ils paroissent plutot appartenir au
 Nerf Accessoire qu'au Nerf Sou-Occipital,,. & ib. n. 163. dicit,, En-
 fin les Nerfs Sou-Occipitaux, autrement appellés Nerfs de la dixieme
 Paire, ont cela de commun avec les Nerfs de la Moëlle allongée,
 qu'ils n'ont chacun pour origine qu'un seul Paquet anterieur de Fi-
 lets, & qu'ils n'ont point de Paquet ou Faisceau Posterieur comme les
 Nerfs Vertebraux. Il est vrai qu'en arriere on y trouve quelque-
 fois a chaque côté un petit Filet simple, qui neanmoins paroît plutot
 appartenir au Nerf Accessoire de la huitieme Paire qu'a celui de la di-
 xieme,,.* Cur iam Auctor veram hancce originem posticam Nerui
 primi Ceruicalium pro radiculis Nervi Accessorii vnice habe-
 re maluerit, quam pro eo quod est, mirum est in tanto Anato-
 mico. Si enim ultra inquisiuisset, summam Viri perspicaciam
 nunquam subterfugisset furculus ille, ex hac commixtione ad
 foramen Arteriae Vertebralis secedens, ibique iunctus an-
 ticae suae origini communem truncum Nerui primi Cer-
 uicalium efficiens, vti dictum est in §. nostro XII. Sed
 de eo quid dicemus, quod duplicem huius Nerui ori-
 ginem quam euidentissime reiteratis vicibus in accuratissimis

Tabulis Eustachianis expressam videmus (4); de qua CEL. WINSLOWIUS nec mentionem facit, nec eam depingi curavit in *Tabula Eustachiana* XVIII. suis operibus praefixa. Quod absque omni dubio sculptoris vitium erit. Quia vero idem error in *Tabularum Eustachianarum* editione *Amstelodamensi* occurrit, extra omnem culpam erit CEL. WINSLOWIUS; cui procul dubio *Editionis Romanae* copia non fuit.

Ambiguitatem huius Nervi auxit potius, quam sustulit, vel certe minuit, RIDLEYUS, de eo agens etiam (5), ac Iconem (6) exhibens; quia vero litem in suspenso relinquit, nihil inde docemur. Ita de eo loquitur (7), „ *Decimum par, quod (si ex utroque latere spinalis medullae duplicem habet originem, qualem habent caeteri omnes spinales Nerui) multo magis proprie vocaretur Primum par Vertebrale, quandoquidem & magna pars ortus eius, eiusdemque egressus omnino est extra Cranii limites.*

Horum igitur Auctorum dubia atque sententias illustratas dedimus descriptione nostra §. XII, & Icone II. in fine adiungenda.

(1) *Adu. An. VI. anim. XXXII.*

(2) *Tr. des Nerfs n. 163.*

(3) *ibid. n. 144.* Simili fere modo de his binis filamentis egit *Tr. de la Tete n. 160.*

(4) *Tab. XVII. fig. II. & Tab. XVIII. fig. I. IV. & V.* sed editio *Romana* consuli debet.

(5) *De Cerebr. Cap. XVI.*

(6) *Fig. I. 10. 10.* (quod potius secundum par Cervicalium refert, quam primum, s. decimum WILLISII) & *fig. VII. q. q.* Nec haec distincti quid repraesentat; Vt fere dubitandum sit an RIDLEYVS verum nervum decimi paris WILLISII viderit.

(7) loc. cit.

§. XVI.

His examinatis, illud, quod vel maxime hac in re agendum est, restat, ut scilicet, quantum eius a me fieri potest, laus sua, quam quisque Anatomicorum hac in re meruit, ei tribuatur. Primam hac in re, uti & in nullis non aliis, laudem meretur BARTH. EVSTACHIUS, plerorumque dubiorum anatomicorum Asylum; qui in Tabulis suis accuratissimis Nervos Vertebrales omnes, ac inprimis primum eorum par, (de quo hic disputatur) duplici origine, *antica & postica* praeditos esse, primus docuit, quod cuique, attente contemplanti *Tabulam, Editionis Romanae, decimam septimam, atque decimam octavam* in promptu erit (1). Id maximopere dolendum est, quod ipsius EVSTACHII Explicatione caremus. Interim tamen ex contemplatione harum figurarum, combinata cum EVSTACHII descriptione (2) exitus huius Nerui, nihil huic Neruo deesse vel ab Auctore omissum fuisse, constabit, tam quoad duplicem eius originem, quam quoad verum exitum eius. Quae sola observatio Eustachiana omni exceptione Willifiana, omnique aliorum Anatomicorum dubitatione maior esse debet; adeo ut in posterum de eius natura, cum reliquis Nervis Vertebralibus communi, dubium superesse vllum debeat. Primus deinde evidentissime ac perspicue de duplici huius Nerui origine, quemadmodum illum ipse vidit, loquitur Observator Oculatissimus I. DOM. SANTORINI (3); ita scribens, *Illud autem praetereundum non est, eius duplicem non (uti ait) esse originem, priorem scilicet ac posteriorem, quum secus nostrae nos doceant observationes. Si quis igitur accuratius huius paris principium exploraverit, id quidem e priori spinalis medullae facie prodire imo dumtaxat sibi deprehendisse videbitur, ut si rem fuerit diligentius scrutatus prioresque propagines ita diducat, ut quidquid posterius est, sub oculos cadat, deprehendet profecto, e postico eiusdem, proximoque latere nonnullos, tres minimum, nerveos surculos prodire, qui etiamsi co-*

pu-

pulati cum priore portione extra spinalem specum protinus non emergunt, non ob id tamen comparem hanc prioris portionis denegandam esse censeo. Haec descriptio, optime quadrans cum rei natura, omne duplicis originis dubium tollit, quia vero Auctor omnes huius Nerui cum Neruo Accessorio combinationes ac varietates intactas relinquit, videtur illum semel tantum vidisse hancce originem posticam: Porro desiderandum relinquit SANTORINI filamentorum posticorum cum prioribus in vnum truncum concursum; quod non minimi momenti & argumenti ei esse debebat, ad firmandam suam sententiam, de duplici origine huius Nerui.

Accuratam dein hanc SANTORINI binarum originum descriptionem roborare, vel certe pro vera agnoscere videtur CEL. HEISTERUS (4). Quamquam ex verbis ipsius in eam sententiam adducor, ipsum fortuna quadam nunquam verum Nervum primum Cervicalium, de quo SANTORINI loquitur, vidisse, alias enim non WILLISII errorem repetivisset, nec tam asseuerate posuisset, se „*nullum*, verba Viri magni recito, „*unquam Nervum inter cranium & primam Vertebrae prodeuntem manifeste conspiciere potuisse.* Si autem verba haec ad Nervum illum secundi paris referuntur, ad quem profecto pertinent, res optime procedit; De eius duplici & numerosa admodum filamentorum serie s. origine nullum dubium movetur; nec novi quidquam hic, quod alias solet, nos docuit Auctor.

Nec vero nullum hac in re meritum habent ipse WILLISIVS, VIEVSSENIUS, atque WINSLOWIVS. Vti enim supra mearum partium fuit, seuere illorum sententias examinare; Ita nunc argumenti ratio, ac imprimis boni viri officium me iubet, debitam laudem, quamquam longe diuersam, & ex parte ex obscuro erutam, iis tribuere atque assignare. Neminem non conuietum speramus, nervum decimum WILLISII hiatum ossis occipitis atque primae vertebrae subire, eundemque esse
ner-

Neruum de quo hic agitur. Quo supposito quisque forte concedet ac perspiciet, duplices eius origines, anticās & posticas, in Iconibus Willisianis expressas esse; quod Nervus Accessorius, filamento huius Nervi antico duobusque posticis intercedens, palam facit (5). Cur autem WILLISIUS eas, neque in Tabulae Explicatione neque in ipso textu indicauerit, & pro diversis originibus agnouerit, non facile dixerim. Susplicari quidem licet, tabulam illam pictoris potius & sculptoris accuratae diligentiae quam ipsius WILLISII ingenio deberi. Hoc autem non impedit, quo minus duplex haec Nervi illius origo post EVSTACHIUM apud WILLISIVM primo sistatur. Nisi VIEVSSENIUS in eo nimium festinasset, quod decimum par Cerebri (vti dictum est) cum primo Colli confundisset, maxime prae reliquis in hac quoque re laudandus esset. Seposito vero illo errore, cuique in aperto est, VIEVSSENIUM Nervo isti (sive iam illum decimum s. primum appellet) non solum duplicem originem adscripsisse, sed & posticam originem, de qua omnis lis est, accuratissime, quamquam paulo minus nitide, in Icone exhibendam curasse (6). Vnde tota fere huius Nervi doctrina s. historia ex eo depromi potest, non sine VIEVSSENI laude. Porro etiam WINSLOWIVS huc referendus esset qui posticam huius Nervi originem vidit; quum vero illam aliter interpretatus fuit, videatur §. praecedens: vbi prolixè de ea actum est.

Haec sunt, quae de Nervo isto, apud Anatomicos potius, quam in ipsa natura, ambiguo dicenda putavi. Si forte prolixitas mea Lectori nauseam peperit, ille Scriptorum discrepantiam accuset. Vti enim docenti, artem quamcunque professi, maxime interest, vt Auctores suos Classicos bene intelligat, eorumque mala aequè ac bona dignoscat ac seiungat; Et aliis omnem in errorem incidendi occasionem, quantum potest, auferat; Ita & me eo facilius excusatum habebit L. B. quod praeipuum Anatomicorum sententias exactiori, non autem contumelioso, (vnde longissime absum) scrutinio subieci. Si

quis sit, qui ob Anatomicorum, supra allegatorum, contra me de duplici huius Nerui origine pronunciantium, Auctoritatem mihi consentire temere velit, (neque sane postulo, vt fidem mihi potiusquam ac suo quisque sensui habeat) is hunc in modum, ad perspiciendum hunc aeque Neruum ac Neruum Accessorium accommodatissimum, ipse naturam consulat.

Serra primo aperiendum est Cranium, more in administratione Cerebri consueto; postea Cerebrum omne atque Cerebellum auferenda sunt caute, sola sibi relicta medulla oblongata, ad initium quarti Ventriculi Cerebri rescissa. Dein pars ossis occipitis posterior adusque primam Vertebram, quantum potest, industria separanda venit, ita tamen vt foramina Nerui octauum & nonum paris, primique Ceruicalium s. arteriae Vertebralis, integra & intacta relinquantur. Tandem tota postica pars Vertebrarum Colli, foraminibus neruorum intercepta, scalpro atque malleo, (quod in iunioribus Cadaueribus etiam volsella praestat) auferatur, illaesa dura matre; Quae sic demum caute per mediam longitudinem vertebrarum discinditur, atque vtrisque reclinatur. His ita peractis, quam euidentissime se conspiciendos exhibebunt vtrisque Neruus Accessorius, filamenta neruea, durae matri largita, atque primi Ceruicalium Neruorum origo postica. Ad vltiorem perquisitionem Nervi Accessorii solummodo caute abscindenda sunt filamenta postica Neruorum colli. Hancce Encheiresin longo vsu maxime opportunam reperi, ad contemplandas veras horum Neruorum origines atque naturam. Et auferendo, dicto modo, dimidiatas reliquarum omnium Vertebrarum partes, illaesa dura matre, non paucas medullas spinales integras e specu sua ossea extrahi. Quarum aliquot in instituto colligi Thesauro Theatri Anatomici adhuc seruantur in spiritu Vini.

(1) Quanquam in *Tabula eius XVIII. fig. III.* duplex huius nervi origo conspici-
nequit, id tamen constantem, duplicem, eius originem infringere non de-
bet, cum sola dispositio sive situs huius partis pictori impedimento esse
potuerit, quo minus bina filamenta s. origines exsculperet. Idem quo-
que valet de primo nervo dextri lateris, de binis secundi paris, de tertio
sinistri lateris, & sic porro de aliis eiusdem *fig. II. Tab. XVII.*

(2) *Exam. os. in opusc. p. 211. & 214.*

(3) *Observ. Anat. §. XXII.*

(4) *Comp. Anat. T. II. p. 132.* vbi Auctor cum IOH. LEONICENO face-
re videtur, qui solus (quantum scio) primum illud par nervorum Cer-
nici denegavit, vti patet ex TH. BARTHOLINO *Anatom. rerou.*
Libell. III. C. III.

(5) Videatur *fig. I. O. O.* Si iam comparatio instituitur figurae huius WILLISIANAE
cum BIDLOI *fig. I. Tab. 9.* apparebit eos sibi inuicem esse per quam
simillimas. Vt adeo & BIDLOVS viderit anticam nervi primi pa-
ris Cervicalium originem, ac posticam. Mirifica autem BIDLOI ex-
plicatio est, & longe recedit a Willisiana, & ab ipsa rei natura. Cum
filamenta *ibid. i. i.* insignita, (quae primi paris nervorum Cervicis o-
rigo postica sunt) pro nono pari venditet. Ipsa autem vera filamenta,
s. origo, noni paris, in interiori magis ac altiori paulum medullae oblon-
gatae parte posita, ibidemque expressa, prorsus non indicat, & intacta
relinquit. Itaque filamenta littera K. K. & I. I. insignita, simul sumta,
nervum primi paris Cervicis (s. decimum WILLISII *fig. I. O. O.*)
constituunt. Quanquam contra mentem BIDLOI. Quis autem vn-
quam vidit Nervum Accessorium ante nervum noni paris incedere?

(6) Vti supra demonstratum est.

§. XVII.

Iam ex ordine insequentur reliqua Paria Nervorum, a
Medulla spinali progenitorum, quae omnia, nemine contradi-
cente, duplici filamentorum serie conflantur, antica alia, alia
postica; ad vnumquemque Nervum efficiendum dante qua-
uis harum binarum serierum filamenta s. funiculos aliquot,
pro diversa sua facie varios ac diuersos. Funiculi enim, cui-
vis Nervus dicati, posteriores in omnibus sunt vel numero plu-
res, vel saltem robore suo paulo maiores, quam antici. Ne au-
tem binae hae series filamentorum cum binis lateribus confun-

dantur, Nerven vnius tantum lateris describam. Fasciculi Nervum suum constituentes vtrimque ad destinatum sibi durae matris foramen concurrunt, quo superato demum veri Nervi formam & nomen accipiunt. Ibiq; tam arcte & intime immiscantur sibi inuicem, vt in Gangliis eorum non amplius distinguere possint, sed in solidam satis, non medullosam substantiam mutati reperiantur (1).

Priusquam insequentes nervos ex ordine recensamus, quaedam de filamentorum nervorum seriebus s. virgis monenda sunt, quae de omnibus Nervis Vertebralibus valent. Diximus §. V. filamenta nervosa ad originem e medulla sibi esse per omnem medullae decursum, imprimis autem in collo, atque in infima medullae parte, arctissime apposita; nec facile ibi in fasciculos, determinatos nervos producturos, posse distinguere. Quod quam verissimum est in iunioribus Cadaueribus, vnius vel alterius quoque anni. In adultis autem partes omnes, aequae ac filamenta illa nervosa, magis magisque crassiores fiunt, maiusque spatium inter vnumquodque filamentum, ac dein etiam inter vnumquemque nervum relinquunt; Vt tandem pro aetate maiori & filamenta, & fasciculi eorum, & nervi inde producti, maiora reperiantur, nec non eadem ratione filamentorum, & fasciculorum eorum interstitia augeantur. Itaque in adultis filamentorum series, s. Virgae, non continuae sunt; uti dictum est de iuniorum virgis filamentosis; sed interstitia habent satis conspicua. De primo iam fuse actum est. Iam describendus est Nervus *Secundi* Paris. Qui a *postica* facie s. virga Medullae eaque fere media filamenta sua accipit, robusta admodum, & numero plura, (sex vel septem) inaequalia, sibi lateraliter in linea recta apposita. Infimum eorum ordinario ad ortum in duos secedit ramulos, maiore & inferiore cum insequentis Nervi filamentis, minore ac superiore cum sui comparibus excurrente. Monemus hic semel, quod semper meminisse Lectores nostros volumus, filamenta ista nec antica
nec

nec postica certum in vnoquoque corpore, eiusdem quamuis staturae atque aetatis, numerum non seruare, sed in aliis crassiora esse & numero pauciora, in aliis tenuiora & plura: porro nec semper aequalia in binis lateribus; Non semel enim ea in latere dextro aliter se habere vidi, quam in sinistro. In hac re, si vsquam, natura respuit exactissimam illam Symmetriam, s. commensum. Sed pergimus. Ab *antica* facie aliquot etiam accedunt filamenta numero vel pauciora, vel saltem minoris crassitie, vti dictum; sibi etiam continua sunt vt postica, & plerumque etiam ex infimo furculus, cum insequenti communicans, dimittitur. Vnumquodque horum filamentorum, anticorum pariter et posticorum, pia matre inuestitum, fere recta via, nisi quod superiora deorsum, inferiora sursum paululum inclinantur, ab ortu e medulla ad foramen, a dura matre relictum, concurrit; omniaque simul communem fasciculum constituunt, qui, superato Durae matris foramine, ab eoque inuolucro accepto, specie nerui, leniter sursum vergentis 2), thecam osseam inter primam & secundam vertebrae Colli penetrat, statim sub margine postico condyli articulatorii primae vertebrae; Nervus iste magnus admodum est, & reliquis Colli paulo maior, & perferendo thecam in Ganglion mutatur, maius etiam prioribus, non rotundum, sed oblongiusculum, quod totum in hiatu, a binis vertebris pro eius transitu relictum, latet. Ex Ganglio hocce duo rami primarii, e directo sibi oppositi, fere aequales, secedunt; quorum posterior, contra reliquorum Nervorum Vertebraliu naturam, paulo maior est, & sub margine articulatorio primae Vertebrae extrorsum ac postice fertur. Alter ramus minor, & anterior, supra egressum processus transversii antrorsum vergens, prodit. Vt itaque hi duo rami eiusdem Nerui duplicem ac diuersum egressum e theca sua ossea habeant, & duplicem nervum simulent, quia eorum ortus e communi ganglio, musculis Intertransuersalibus obtektus, latet. Simili fere modo,

quo dictum est de primo pari, hi rami egrediuntur; Vnde Veterum sententia de duplici primi & secundi paris origine intelligi, & exinde optime explicari potest. A diuisione huius nerui in ramum anticum ac posticum duplices etiam efficiuntur cum superiori neruo atque cum insequente communicationes arcuatae. Et quidem ramus posticus pone processum transuersum duplicem habet cum tertio pari communicationem; aliam minorem arcuatam, & aliam, maius spatium circumscribentem ac maxime posticam. Ne autem nimis hic, & praeter institutum, longi simus, de ramificationibus Neruorum Vertebraliū alio tempore agere constitui.

(1) De his iam diximus in Progr. n. §. XIV.

(2) Vt itaque probe distinguendum sit, inter filamentorum nerueorum intra thecam durae matris decursum, atque inter ipsorum neruorum extra duram matrem directionem; quia in collo inprimis multum differunt binae hae directiones.

§. XVIII.

Tertium par fere vt secundum se habet, & quisque eius neruus ex continua, vtriusque faciei medullae, serie filamentorum conflatur, ad formandum neruum suum, priori in omnibus fere aequalem, nisi quod iste filamenta neruea habet plerumque paulo plura, tam ab antica quam a postica Medullae facie. Filamentorum *posticorum* sunt plerumque nouem, vel decem; *anticorum* fere totidem, sed exiliora. Exilis surculus infimi filamenti, vtriusque faciei, ad supremum insequentis nerui abiens, & communicationem intra thecam a dura matre factam efficiens, rarissime non conspici potest. Attamen probe attendendum est; (quod de prioribus etiam ac insequentibus dictum esse volo) ne filamenta ista communicantia in facie postica confundantur cum radiculis Nerui Accessorii; cum distinctis-

stinctissima sunt ab iis, nec facile cum iis confundi possunt, si modo ad eorum directionem attendatur. Surculi enim hi communicantes a superiori ac interiori parte deorsum & extrorsum incedunt, et in superficie maxime postica conspiciuntur; Cum contra ea radiculæ N. Accessorii sint paulo anteriores, & ab interna ac inferna origine sua extrorsum ac sursum ferantur. Itaque se decussatim praetereunt. Ab antica facie hac cautela opus non est, vbi plane nihil communicationis filamentorum anticorum cum Neruo Accessorio intercedit. Quod Ligamentum denticulatum prohibet. Caeterum Nervus, in quo versamur, tertius, vt prior, oblique sursum fertur, quamprimum Inuolucrum suum a dura matre accepit; In ipso foramine suo secundae & tertiae Vertebrae in ganglion degenerat, vbi in trochlea quasi, vt illud secundi Paris, latet, quia etiam oblongiusculum est, & foramen osseum altius positum habet foramine durae matris. Ganglion istud prioris in modum obtectum est Musculis, duosque, sed longe diuersos, ramos, sibi e directo oppositos, dimittit, quorum prior, truncus merito dicendus, per hiatus anticum processuum transuersorum exit, posterior, exilis admodum, ad spinam properat.

§. XIX.

Quartum Par, atque *Quintum* eandem seruant rationem cum prioribus, quoad filamentorum in vtraque facie ortum. Nec Filamentum communicans, a postica saltem facie, ordinario abesse solet, quamquam alterum ab antica non semper aequè distinctum adsit. Ex aequali etiam, quo superiores, filamentorum numero quiuus Nervus eorum oritur. Nerui tamen ipsi superioribus sunt paulo minores; hinc etiam Ganglia minora, simulque rotundiora habent, tenuem tantum surculum postice demittentia, trunco antrorsum verso. Haec Gangliorum diuaticatio Neruis insequentibus omnibus communis

munis est. Caeterum hi Nerui eandem cum prioribus directionem, sursum versus foramina, ossea, seruant, & vix dum intra thecam osseam conspici possunt. Insequentes autem magis.

§. XX.

Sextum, Septimum, & Octauum Par sibi invicem sunt similima, & in omnibus fere eadem cum prioribus. Filamenta neruea numero vtcunque eandem habent quantiatem pro quovis neruo; non tamen plane simili, quo priora, modo in communem truncum concurrunt. Filamenta enim septimi & octavi Paris ex ortu paululum oblique descendunt versus duræ matris foramen. Et quando exactius attenditur, non raro filamenta nervea vnius lateris paulo altius oriuntur, quam eadem alterius, vt ita non plane & in omnibus nerui eiusdem paris sibi sint aequales; nec e directo præcise e lateribus exeant. Quod quidem non exacte satis in Icone expressum iam deprehendo.

Non nocebit hic indicare, quod Nerui harum coniugationum, quamvis magnos ex parte producant Nervos Brachiales, tamen non maiores sint superioribus; nec filamentis gaudeant numero pluribus; nec Ganglia producant tumidiora; nec Filamenta neruea inter se aliquid admittant differentiae, ratione lateris, dextri vel sinistri, quod saltem in oculos caderet, et constans esset; nempe vt in tribus vel quatuor Neruis vnius lateris crassities vel numerus filamentorum auctus observari posset, superans filamenta alterius lateris. Non infrequenter tamen euenit, vt Nervus v. gr. septimi Paris decem accipiat filamenta Neruea a Medulla spinali in latere dextro; in sinistro autem octo tantum vel nouem eiusdem crassitie. Sed hoc in casu simul evenit, vt Nervus sexti, & octavi paris plura habeat filamenta in latere sinistro quam in

in dextro. Vnde ratio a Neruis petita cadere videtur, vni Brachio prae altero maius robur largiendi. Quia vero robur illud etiam imperceptibile filamentulum nerueum praestare & vni parti prae altera tribuere valet, siquidem mirabilis, inexplicabilis & maxima minutissimarum fibrillarum uis Neruis inest: Ea propter etiam ex dicta structura diuersa, duobus Neruis eiusdem coniugii intercedente, nihil probare conabor, nequidem argumentari. Sed has obseruationes saltem iis opponere volo, qui vni lateri prae altero Nervos adscribunt crassiores, & inde actionum facultatem vel facilitatem (quod potius consuetudini adscribendum est) dextrae aut sinistrae manus explicare cupiunt. Si tamen ratio, cur Homines non omnes ambidextri sint, in Corporis nostri Oeconomia animali quaerenda esset, eam potius in arteriarum Brachialium (1) diuersa diametro latere putem. Sed redeamus in viam.

Non quisque Nervus horum trium Parium gaudet in vtraque facie filamento communicante, ab vnius nerui fasciculis ad eosdem alterius excurrente, cum inter filamenta septimi & octauum Paris non semper tale filum reperiatur, & rarissime vel nunquam inter octauum & nonum. Horum Nervorum decursus a superata dura Matre ad foramina ossea oblique sursum itidem, vti priorum, fertur. Ganglia his etiam sunt exiliora ac rotundiora, quam secundi & tertii Paris. Nerui quinti aut sexti Paris aut vtriusque non raro sulcum habent pro transmittendis vasis, qualem etiam in vno vel altero Neruo Lumbalium videre est.

Quomodo autem haec tria paria cum quinto Ceruicis ac primo dorsalium Nervos Brachiales efficiant notissimum est, nec hic indicabo, nec omnem descriptionem Nerui Diaphragmatici, a tertio, quarto & quinto plerumque pari generati, tradam; id vero filere non possum; fere semper singularem furculum a quinto pari secedere, qui ab Anatomicis pro Neruo Cutaneo habitus fuit; sed singularem vsum habet, & ad augendum

Neruum Diaphragmaticum cum aliis radicibus facit. Ea plerumque in fede e quinto pari exit radix ista singularis Nerui Diaphragmatici, vbi neruus quinti paris cum neruo sexti paris arcte adhaeret, & intime fere immiscetur, vt quandoque vix dici possit, an a neruo quinti vel sexti paris procedat furculus ille; inde fere recta antrorsum, paulumque deorsum oblique, fere ad clauiculae directionem incedit, ramulum in via largiens ramosum Musculo Subclauio; in ipso demum pectoris Cauo trunco Nerui Diaphragmatici iungitur, cum quo per aliquot spacium distinctus excurrit, priusquam intime ei immisceatur, comunemque truncum efficiat. Huncce Neruum Ipse iam aliquoties parauit atque publice demonstraui lynceus noster Anatomicus CEL. HALLERVS.

(a) Ne tamen experimentum illud fallat, exacte calculus instituendus est in iis, quibus duae in vno vel altero brachio sunt Arteriae Brachiales. Quod, vti iam aliquoties expertus sum, non raro euenit. Quae duplex Arteria Brachialis imprimis Chirurghi summam attentionem postulat, qui vel ordinario modo, vel ad articulum Brachium amputare cupit.

§. XXI.

Neruus *Noni* Paris sua itidem filamenta nervea accipit ex continua serie plura, crassa, & simili modo, vti superiores Nervi, latam admodum compagem efficientia, vt non facile distinguuntur a se inuicem (1); Pauciora autem habet ex utraque medullae facie. Ab *antica* plerumque quinque, a *postica* sex, vel septem. Quae vtrimque ex ortu oblique deorsum atque extrorsum vergunt, & magnum in dura Matre foramen pro transitu faciunt; Quum primum ibi in Neruum abierunt, extra thecam durae matris rursus ascendunt extrorsum, & in ea altitudine, quae respondet origini eorum e medulla spinali filamentorum, meatum osseum inter octauam ac nonam vertebra (s. primam & secundam thoracis) subeunt, vbi ganglii for-

formam acquirunt. Ganglion hoc rotundum, non magnum, insequentibus tamen dorsalibus paulo crassius est; nec immerito, quia maxima eius propago ad augendos Nerven Brachii facit. Et ea ipsa ratio, quod Nervus iste suum tribuat ad constituendum plexum Nervorum Brachialium, atque quod similem habeat cum reliquis Cervicalibus structuram, facere omnino posset, quo commode nervis Cervicis annumeraretur; nisi ratio simul habenda esset Vertebrarum costas emittentium, quarum intercapedinem perforat.

- (1) Ad huius quoque Nervi naturam exacte attendit VIEUSSENIUS, eamque bene exprimit *Tab. XX. fig. II. 9. 9.* BLASII Icones atque descriptiones nec in hoc nervo, nec in aliis aliquid illustrare possunt, quia BLASIVS *de Med. Spin.* solis Brutorum sectionibus contentus fuit, nec humana Cadavera in usus vocavit. Sed & aliae plurimae praeterea exstant Icones Medullae spinalis, exigui tamen usus. VESALIUS iam figuram dedit, *de H. C. fabr. lib. IV. cap. XI. figurarum praefixarum prima*; quae in plerorumque Anatomicorum scriptis recusa occurrit. Deinde BARTH. EVSTACHII Iconem non malam habemus Vesalianae oppositam, *Tab. XVII. fig. II.* (Harum Tabularum Explicationes avidissime expectant & importune fere flagitant omnes, qui mecum sapiunt Anatomici hodierni, a Principi Anatomicorum BERNH. SIGF. ALBINO.) Rudes vero sunt WILLISII *Anat. Cerebr. Tab. XII.* atque TH. BARTHOLINI *Anatom. renou. Libell. III. cap. III, addita.* Dein quoque recentiorum Anatomicorum Icones habemus, elegantissime exsculptas, minus tamen exacte naturam exprimentes, v. gr. BIDLOI *Anat. C. H. fig. 10.* atque RIDLEYI *de Cerebr. fig. 1.* BIDLOI figura omnem medullam expressam sistit, RIDLEYI eius saltem initium ad dorsum usque; neutra tamen distincti quid repraesentat. Ut itaque hae omnes cedere debeant Iconibus VIEUSSENIANIS. Quia tamen & eae ipsae mihi non in omnibus satis faciunt, malui proprias hic addere; quae non semel, sed iteratis vicibus, ad viuum semper delineatae fuerunt, usque dum tandem tales factae sint, quales nunc damus. Dexterrimus hac in arte Vir. Dn. Rollinus eas delineavit, & ipse quoque hinc inde manum operi admovi, quia ipsius Anatomici manum his etiam in rebus accedere optabile est, qui semper magis naturam rei distincte exprimere studet, quam servire elegantiae.

§. XXII.

Insequuntur iam Nerui simplicioris structurae, fere nullis varietatibus ac differentiis notabiles : Cum a *decimo* pari ad usque *decimum septimum* inclusive Nerui omnes sibi in omnibus, quantum eius sensu nostro assequi potuimus, sint simillimi. Qui primo intuitu a reliquis facile distinguuntur, imprimis a superioribus. Medulla spinalis horum neruorum filamenta ex alto emittit, longe infra ortum per foramina durae matris ac vertebrarum abitura. Filamenta ista in vtraque facie post exortum suum inflexo decursu per medullae conuexitatem oblique deorsum excurrunt, & fere ad semipollicem infra exortum e medulla duram matrem subeunt. Dat medulla pro quouis neruo constituendo filamenta sua neruea, a *postica* facie bina vel terna, distincta valde, ac robusta. Ab *antica* facie horum filamentorum bina tantum sunt, minus distincta, & paulo magis composita, vbi pro quouis neruo aliquot, tria vel quatuor filamentosa fila (1) e medulla exeunt, breui rursus confluentia, & duas chordulas producentia. Cum in postica facie bina illa vel etiam tria filamenta s. chordulae simplici, non filamentoso, exortu prodeant. Filamenta horum neruorum non, vti modo dicta, ex continua serie producuntur, sed inter bina quaeque cuiusuis nerui, in vtraque facie, filamenta spatium relinquitur aliquod, a filamentis liberum; quod spatium s. interstitium leue, exilius est in antica facie, quam in postica. Pro ratione partium quibus inseruiunt etiam Nerui isti sunt graciles, eorumque ganglia tenuiora, quam reliqua, sibi vero inuicem aequalia. Directio horum Neruorum, postquam semel durae matris inuolucrum acceperunt, intra thecam osseam diuersa est pro ratione altitudinis cuiusuis nerui. Quo enim quisque collo propior est, eo etiam magis ascendere debet, ad quaerendum exitum, vertebris interceptum. Quo contra ea Nervus inferior est & Lumbalibus propior, eo etiam

etiam foramen suum osseum multo inferius habet foramine suo durae matris. Neruis sursum & alteris deorsum vergentibus limes interposita sunt paria duo, decimum quintum & decimum sextum ; quae foramina durae matris, eaque vertebrarum e directo opposita habent; atque adeo recta absque ulla inclinatione exeunt. Ibi autem non semper limes positus est; saepius etiam decimum tertium par, vel & duodecimum recta via exit; raro tamen infra decimum sextum par nerui non oblique deorsum vergendo foramina sua ossea subeunt.

(1) Ad filamentosam istam anticarum originum iam attendisse videtur VIEUS. SENIUS, qui eam *fig. III. Tab. XX.* conuenienter satis depingi curauit.

§. XXIII.

Paria Neruorum *decimum octauum, decimum nonum, vigesimum, & vigesimum primum* eandem quidem habent structuram cum praecedentibus, iisque similia plane essent, nisi hoc sibi peculiare haberent, quod filamenta ex continua quasi serie, saltem sibi perquam proxime apposita, e medulla exeunt: et quod eadem filamenta flexuosum ac serpentinum decursum, tam per ipsum Medullae corpus, quam extra illud, priusquam foramina durae Matris subeunt, longius protrahunt: Porro illud, quod nerui paulo longius excurrunt, priusquam in ganglia abeunt: Itemque quod Ganglia ista in ipsa vertebrarum theca conspici incipiunt (1). Vti filamentorum Nerueorum ortus per omnem Medullae spinalis decursum ab antica facie proximior est mediae medullae; ita praecipue hic illud est obseruabile, cum filamenta vigesimi ac vigesimi primi Paris ad ortum ab utroque latere sese fere attingant, et pauxillum spacii interpositum habeant in medio, quod, praeter ligamentum illud medium, medullae se immittens, ac vasa, eundem cum ligamento decursum seruantia, fere nihil est.

Multo magis adhuc subsequens Neruorum filamenta sibi oriuntur propiora versus mediam Medullam, quo enim sunt inferiora haec filamenta, eo etiam arctius sibi apposita oriuntur, magisque concurrunt ex utroque latere, ut tandem confluere quasi videantur ad exortum filamentorum vigesimi primi vel secundi Paris. Et infra nondum tamen, si exacte inquiritur, ad angulum constituendum concurrunt. Sed ad infimorum usque exortum spatium medium, ab iis liberum, relinquitur.

(1) Haec omnia, quantum potui, exacte exprimi curavi in Icone I.; quamvis ipsa theca ossea non depicta sit, eius tamen loco ab vno latere thecae capacitas nigra umbra expressa est.

§. XXIV.

Paria Neruorum *vigesimum secundum*, *vigesimum tertium* atque *Vigesimum quartum* distinctis adhuc filamentis, eo ordine, quo se attingunt, & e medulla prodeunt, deorsum feruntur, postquam ad primum ortum paululum extrorsum tendebant, vel dirigebantur. Filamenta *postica* vigesimi secundi paris iam incipiunt minus spatium, originibus utriusque lateris interpositum, in Medullae medio relinquere; Et inde descendendo spatium illud medium semper minuitur. Ut, quo inferiora oriuntur filamenta, eo etiam magis magisque sibi accedant, usque dum filamenta vigesimi quarti paris, ex utroque latere concurrentia, verum angulum in media medulla efficiant: Et series filamentorum utriusque lateris, hucusque distinctae, hic in vno puncto combinantur, ut ibi corpus medullae, in situ suo naturali relictæ, desinere videatur; Quamquam non parua inferius adhuc supersit medullae portio, filamentis s. chordulis nerueis, caudam equinam constituentibus, obiecta. Iste medullae apex, s. angulus potius, a filamentis vigesimi quarti Paris factus, respondet supremæ parti primæ vertebrae lumbalium

balium ; quam infrequentius longe transgreditur, quam attingit. Ab *antica* facie fere se in media medulla attingunt filamenta horum Neruorum, tam altiora quam inferiora, vti dictum est in §. antecedenti. Filamenta ista tam antica quam postica incipiunt prioribus paulo crassiora fieri ; non tamen proportionem magnorum, qui inde exoriuntur, neruorum. Vidimus quandoque vltra decem filamenta pro vno dimidiato neruo Colli e medulla exire ; heic autem rursus alia est Mechanica ; cum raro vltra tria vel quatuor eorum, sed paulo crassiora, reperiantur ab vna facie pro vno dimidiato Neruo. Hic autem origines istae vel filamenta hucusque neruea dicta, ob suam crassitiem ac rotunditatem non male chordulae vocantur. Quod harum Chordularum decursus intra thecam durae Matris valde flexuosus ac intortus sit, facile est ex longa via, quam faciunt, priusquam duram matrem subeunt, iudicare. Dictum est enim, quo inferiores sint Nerui, eo etiam longiora esse eorum filamenta, i. Chordulas, altioremq; longe esse eorum egressum e medulla, quam eorum durae matris perforationem. Haec omnia de *antica* facie aeque valent ac de *postica* ; nisi quod, vti iam aliquoties dictum est, filamenta i. chordulae anteriores sunt paulo tenuiores, & lacertosae originis. Ganglia horum Neruorum pro munere eorum etiam sunt paulo grandiora superioribus, & in ipsa theca ossea formantur ad eandem, qua priores, a durae matris perforatione distantiam. Quia vero heic theca ossea capacitatem suam thecam, a dura matre productam, multum superat, eapropter etiam non solum ganglia intra specum vertebrarum conspici possunt, sed etiam portio ipsius Nerui, infra Ganglion, constituta ; quod vero tantum, de vigesimo verum esse incipit. Nerui isti fere eandem, oblique descendentem, directionem habent, priusquam per interstitia vertebrarum profiliunt, ac filamenta eorum intra thecam durae matris.

§. XXV.

Reliqua Neruorum Paria vel potius eorum filamenta s. chordulae ex ea medullae parte oriuntur, quae, sibi relicta, fere conspici nequit, cum propriis suis chordulis circumcirca fere inclusa & obiecta lateat; non tamen exilem Medullae substantiam comprehendit. Ab *antica* quidem eius facie in statu naturali pauxillum Medullae spinalis eminet; a *postica* vero, binisque lateralibus plane nihil. Quamprimum autem filamenta pauxillum reclinantur, apparet a postica facie pars medullae filamentis utriusque lateris interposita, qua a caudae initio deorsum coni divergentis figuram exhibet. In utroque latere tunc etiam magna pars, ab omnibus filamentis s. chordulis libera, videtur. Ab antica facie nihil mutari potest. Gaudet itaque haecce Medullae spinalis pars, quae Caudae Equinae basis vocanda est, quatuor adhuc faciebus laeuibus, totidemque chordularum seriebus, quae illi sunt interpositae. Ista Caudae Equinae basis medullosa exilis admodum est, minime vero chordulis progenitis proportionata, longitudine sua semivnciam tantum aequat in iunioribus, in adultis integram vnciam. Nec dum ad egressum infimorum filamentorum nerueorum medullosa substantia desinit. Ex hac enim caudae basi plurimae emittuntur chordulae, insignem, ac implicitum quasi flexuosarum chordularum, dextrarum, sinistrarum, anticarum, & posticarum fascem efficientes. Quae omnes funiculorum instar, promiscue excurrentium, durae Matris Cavitatem inter primam vertebrae lumbalium ac tertiam ossis sacri intercedentem, adimplent. Quamprimum funiculi s. chordulae istae solidam suam partem, medullam nempe spinalem, reliquerunt, ex lata compage descendendo paulatim diminuuntur, in via fasciculatim utrimque chordulas, ad efficiendos nervos, dimittentes. Integra haec innumerorum funiculorum congeries *Cauda equina* vocatur.

Quan-

Quamquam Chordulae Caudae Equinae in situ naturali ab vtraque facie ac latere promiscue oriri, sibique implicitae esse, earumque decursus implicatus ac mire immistus videatur; tamen ordo ratione ortus atque egressus in iis seruatur elegantissimus & exactissimus, superiorum in modum. Quod cuique attente inspicienti evidentissimum erit. Quippe Chordulae hae omnes ex continua & simplici vtriusque faciei serie ac ordine ita e medulla prorumpunt, vti foramina vertebrarum subeunt. Superiores itaque Nervi etiam altiores accipiunt chordulas; chordulae vero, ex infima medulla prodeuntes, etiam infimos producant nervos. Quo altius quaeque chordulae ortum suum e medulla trahunt, eo altiorum subeunt vertebrarum interstitia. Et sic Nervi omnes ex ordine filamenta s. chordulas suas a medulla spinali absque turba in vtraque facie accipiunt.

Verum infimae Chordulae nerueae non ex infima penitus Medullae Spinalis substantia egrediuntur, sed infra se medullosum apicem positum habent, sex circiter lineas longum in adultis, ab omni filamentosa nervorum propagine liberum. Apex iste s. ultimus Medullae Spinalis finis non statim in conum conuergit (1), sed elegantem in modum in duas eminentias plerumque, per arctiorem in medio praecinctionem distinctas, terminari solet (2). Ad conspiciendas has duas eminentias, caudae equinae funiculis plane obtectas, funiculi hi reclinari paulum ac diuaricari debent, & tum demum in conspectum veniunt hae eminentiae, vnacum filamento illo ex infimo apice per caudam equinam excurrente, & male pro nervo impari a quibusdam habito. Ultima E. portio medullaris plerumque & ordinario ad infimam vel mediam partem secundae vertebrae lumbalium definit; quamquam in aliis quandoque paulo altior reperitur, nunquam forte profundior (3). Redeamus iam ad reliqua Nervorum Paria, quorum quaedam adhuc recensenda supersunt.

- (1) Vti WINSLOWIUS quidem putat, quando dicit, *Tr. de la Tete n. 124.* Corpus Medullae advsque primam vertebrae lumbalium descendere, ibidemque in acumen desinere. Interim tamen ego Medullam rarissime absque vna vel altera eminentia, vel intumescencia rotunda in acuminatum apicem, vel in conuergentem conum abire, sicque desinere vidi.
- (2) Plura de his Eminentis videantur in *Progr. n. p. 19.*
- (3) In *Progr. n. §. XI.* Medullae finem ad vltimam dorsalium vertebrarum positum esse diximus, vel & ad primam lumbalium, quod interdum verum est, prout ipse tum obseruavi; magis tamen frequenter medullam altius descendere, plures iam & frequentiores obseruationes nos docuerunt.

§. XXVI.

Nerui infra vigesimum quartum par omnes, vti dictum, ex equina cauda optimo ordine egrediuntur. *Vigesimum quintum & sextum* Par Neruorum a vigesimo tertio & quarto non recedunt, neque in chordularum numero, crassitie, ac decursu, neque in gangliorum magnitudine. Nisi quod chordulas suas longius intra thecam durae matris, & flexuosius protractas, ab equina cauda distant, gangliaque a foraminibus osseis magis distant.

Vigesimi septimi, octauo, noni, & trigesimi parium nerui longissimas habent chordulas, easque maxime intortas, non multo tamen prioribus minores, quo propior vero quouis neruus est trigesimo, eo crassities harum chordularum magis imminuitur, vt tandem neruus trigesimi Paris maxime conueniat ratione crassitiei cum primo Colli. Quae bina etiam paria, primum & vltimum, prae reliquis varietates habent multas: quae vltimo obtigerint proxima paragropho dicetur.

Duplicia pro vnoquoque horum Neruorum requiruntur filamenta pro more reliquorum vertebralium neruorum omnium, *antica* minora, & *postica* illa paulum superantia. Horum Ganglia durae matri proximiora sunt paululum, imprimis vero vltimi paris. Nerui vero ex iis producti longum
iter

iter intra thecam osseam trans membranam pinguedinosam, vel gelatinosam potius heic dicendam, faciunt, priusquam ad foramina sua perveniunt. Haec gelatinosa pinguedo, hic copiosissima, non parvam parit difficultatem hosce parandi nervos, atque a filamentis, non paucis, durae matris fecerendi ac distinguendi. Si tamen caute satis secatur, parsque glutinosa seiungitur, infimum par neruorum, gracillimum quanquam, gangliolo suo imprimis differt ab interpositis illis durae matris propaginibus filamentosis, ad firmandam puto duram matrem emissis; Nec minus distinguuntur filamenta illa ab infimo medio filamento s. ligamento, praeter ganglion omnem fere speciem Nerui prae se ferente, et celebrem olim Neruum impari(1) mentiente. Sed planius est nervis ligamentum illud, per medium infimi ossis sacri excurrentis, nullo foramine se insinuans vti nerui, & infimam tantum duram matrem coercens & affigens.

(1) De quo iam egimus in *Progr. p. 17.*

§. XXVII.

Quoties structura Medullae Spinalis, eiusque Neruorum perfecta est, toties Neruorum ex ea triginta Paria eum in modum, vti dictum est a paragrapho duodecimo ad hunc usque, oriuntur (1). Quorum unusquisque Nervus ex utraque medullae facie filamenta sua, in fasciculos congesta, accipit, suumque durae matris foramen, aliudque osseum, a duabus vertebrae interceptum, subit. Naturam autem non raro ab hac structura recedere, euincit saepissime repetita inspectio. Quapropter de vario, in variis cadaveribus humanis, neruorum numero hic addendum habeo, quomodo variantem hac in re Naturam inuenerim. Quandoque enim viginti nouem tantum Paria vidi; & quandoque, quod tamen

rarissime fit, viginti octo tantum (2), thecam durae Matris perforantia. Quoties vero hoc contigit, toties fere ex vnico vigesimi octauo nerui Ganglio duo in vtroque latere nerui producebantur, ad proportionatam vertebrae ossis sacri distantiam thecam osseam perforantes: vt talem in modum vere viginti nouem paria ad minimum semper adsint. Interdum etiam vigesimum nonum Par, quod non tam infrequens est, similem in modum, vti dictum est de vigesimo octauo pari, alterum adhuc, trigesimum nempe, Par ex suo ganglio emittit. Non raro tamen vigesimum nonum Par proprio suo & simplici ganglio gaudet numerumque claudit. Id autem quod rarissime euenit, illud est, quod Nerus trigesimi Paris, dictum in modum, ad augendum numerum, ordinariumque excedendum, trigesimum primum Par educat. Nerui isti, secundarii quasi, ex aliis producti, sua ordinario, exilissima quamuis, habent Gangliola; paululum infra ea, unde generata fuerunt, posita: Caeterum tamen eiusdem esse virtutis hos Neros secundarios, ac si singularia filamenta neruea per propria durae matris foramina accepissent, eorum structura suadet.

Illud quidem manifestum est, thecae, a dura Matre productae, foramina numerum neruorum non claudere, nec eo semper respondere. Erunt itaque plerumque & ordinario Paria neruorum vertebrarum triginta (3). Raro viginti nouem (4). Quamrarissime triginta vnum (5). Mihi, vltra quadraginta Cadauera humana in huius tractionis gratiam caute & attente perlustranti, semel tantum accidit, & tum id quidem obscure admodum, trigesimum primum Par videre, quod ossi Coccigis, omnis perforationis experti, lateraliter appositum erat; nisi simul vertebrarum numerus aliqua in parte spinae forte auctus fuerit. In quod tum mihi inquirere non licebat. Nempe illud hic addendum est, reperiri nonnunquam vertebrarum numerum, ordinario maiorem;

rem ; & rarius etiam minorem. Quibus in casibus Nervorum numerus ratione vertebrarum auctus vel imminutus erit. Ita vt semper nervorum numerus intercapedinibus vertebrarum respondeat. Nic. MASSA (6) tamen & ibi se aliquid varietatis observasse asserit ; dicens, quandoque per idem foramen sphondylorum duos nervos exire ; & hoc quidem non monstrosum esse, sed naturam quandoque ad maiorem fortitudinem corporis, vel alicuius particularis membri id intendere. Ego vero nunquam tale quid reperi. Videamus paulum quid vertebrae possunt ad augendum vel minuendum numerum nervuorum ordinarium.

In genere tamen & ordinario omnes Anatomici cum GALENO (7) viginti quatuor numerarunt vertebrae, ossi sacro impositas, & spinam constituentes. Septem scilicet Colli, duodecim Dorfi, & quinque Lumborum. Quem numerum iam HIPPOCRATES (8) designavit, atque AUR. C. CELSVS (9). Et FALLOPIVS expresse dixit (10), se nunquam in homine plures vidisse, quam viginti quatuor, nec vnquam pauciores. Interim tamen quandoque in vna classe plures, in altera pauciores inveniuntur, quo etiam nervuorum classes turbari vtcunque possent, quod hic monuisse non nocebit. In Ceruice pro septem octo interdum naturam effecisse asserit B. EVSTACHIUS (11) & R. COLVMBVS (12), qui praeterea nonnunquam sex solummodo vidit. Ita quoque (vt breuiter saltem Vertebrarum varietates, in vnaquaque classi earum obseruatas, inspiciamus) thoracis vertebrae vndecim vel & tredecim obseruarunt GALENVS (13). VESALIUS (14). EVSTACHIUS (15). COLVMBVS (16) & VIDVS VIDIUS (17). FALLOPIO nunquam vndecim, sed bis tredecim visae sunt (18), totidemque costae. Haec tamen FALLOPII obseruatio non infringere debet eius regulam, supra indicatam, de constanti in vniuersum summa & numero vertebrarum ; addit enim obseruationi suae quatuor tum ver-

tebras lumborum solummodo adfuisse. RIOLANVS F. (19) vero dissecuit Cadavera, quibus vndecim tantum essent vertebrae, atque costae; ac alia quoque, quibus dorsum tredecim constabat vertebris, totidemque costarum paribus; in eo tamen FALLOPIO consentit, quod nulli horum corpori in tota compage vna vertebra vel defuerit, vel abundarit. Ut itaque secundum FALLOPII atque RIOLANI observationes idem semper maneat numerus in integra compage, nec vnquam turbetur; cum pars quaedam, in vna classi superflua, in altera rursus deficiat. Attamen ipse syntaxin ossium, ita constitutam, vidi, qua tredecim vertebrae ad perficiendum dorsum concurrerent, totidem costarum paria emittentes; vbi tamen nec collo, nec lumbo aliqua vertebra defuit. Tale sceleton, nitidissime paratum seruat Praeceptor atque Cognatus meus longe optimus EM. KOENIGIVS, ante Anatomiae, iam vero Theoretices Profess. Basil. optime meritis. Quoad os sacrum autem, numerumque vertebrarum s. corporum, illud componentium, longe alia ratio est; cum non solum vna vel altera reperiatur observatio, contraria ordinariae eius structurae, sed praeterea multum discrepent Anatomici de vero ossium ossis sacri numero; & plerique Veterum, nescio cur, ossi sacro sex ordinario tribuant ossa, & ita quoque rem Iconibus exprimant, & rarissime quinque eorum solummodo adesse confirmant v. gr. VESALIVS (20). CABROLIVS (21). COITERVVS (22). INGRASSIAS (23). COLVMBVS (24). PICCOLHOMINVS (25). BOEKELIVS (26). & C. BAVHINVS (27). SAL. ALBERTVS (28) autem, atque PETR. PAAWIVS (29) non solum sex ossibus s. vertebris compactum esse dicunt os sacrum, & ita constanter depictum exhibent; sed addunt praeterea, se saepius, (vti dicit ALBERTVS) vel saltem aliquoties (quae PAAWII verba sunt) septem vidisse vertebrae in osse sacro, praeter os coccygis; cui quatuor quoque officula assignant. Forte tamen auctores

hi allegati omnes vnum vel alterum quoque ossiculum ossis Coccygis annumerauerunt ossibus ossis sacri; raro enim, vel & rarissime in vno, & continuo osse, quod sacrum proprie dicitur, sex segmenta s. corpora, tot vertebrae quasi referencia, reperiuntur; & rarius adhuc quinque integra foramina in eo exsculpta esse puto; Nec CEL. ALBINVS (30) mentionem facit de sexto ossiculo s. corpore ossis sacri; quamvis CEL. WINSLOWIVS (31) interdum sex reperisse affirmet.

Sed VESALIVM, aliosque iam diu oppugnarunt FALLOPIVS (32), atque EVSTACHIUS (33); quorum iste dicit, os sacrum maxima ex parte & ita ordinario quinque habere particulas, & quatuor vtriusque foramina absoluta, imprimis autem ad haecce verba eius attendendum est „*Sacrum ab adversariis appellatum os pluribus hominibus in sex partes esse diuisum, totidemque foraminibus vtrinque ante & retro peruium; ita falsum est, ut reprobatione non egeat*: & quae sunt reliqua; & ille tum demum osi sacro sex ossa tribuit, quando coccyx tria tantum habet loco quatuor. Ac deinde ipse quoque VESALIUS, perlectis FALLOPII observationibus, sententiam suam, supra indicatam, limitare, & mutare coepit in *Observationum Fallopii examine* (34), dicens „*Quod ad ossium sacri ossis adultorum numerum attinet, ego in descriptione, sacrum os sex ossibus efformatum retuli: non subticens, qui (s. quin) plerumque & saepe profecto, quinque efformetur ossibus*. Correctam hanc VESALII sententiam, vel potius Fallopianam, atque Eustachianam dein plures secuti sunt Anatomici; vti SPIGELIVS (35). RIOLANVS (36), C. BARTHOLINVS (37); atque alii. Mihi saltem dubium nullum est de constanti ossis sacri vertebrarum numero, quinarium nunquam vel rarissime excedente.

(1) Ex supra dictis satis patet, nos Nervis Vertebralibus s. spinalibus annuere decimum par WILLISII, excludere vero a generali titulo nervorum Vertebralium Nervos ad octauum par Accessorios, ob rationes §. VIII. allegatas. Nonnulli tamen Anatomici nervos Accessorios spinalibus adiungunt, quamvis iidem dicant spinales nervos plurimis fibris ab antica & postica medullae parte oriri. Quum vero parum intersit, quo referantur nervi illi, vere ambigui, modo nervorum vertebralium ordinem, receptamque classium dispositionem, non turbent; eos mittamus.

(2) Quando Anatomicorum quidam viginti octo solummodo paria adesse contendunt uti RIOLANVS *Enchirid. Anat.* p. 450. & *Anthropolog.* L. V. C. XLIX. atque BLASIVS *de Medull. Spin.* p. 72. non cogitarunt de vigesimo nono pari, ex ultimo, nempe vigesimo octauo, producto. Ego vero nunquam ita absolute viginti octo tantum paria vidi, vertebrarum foramina subeuntia; mea enim sententia, supra dicta, saltem ad filamenta nervea, duram matrem penetrantia, & in ea viginti octo foraminum paria efficientia, se extendit; quo in casu semper vigesimum nonum par, dicto supra modo, (de quo nemo, quod sciam, mentionem adhuc fecit) exit.

(3) Plerique Anatomici triginta nervorum, e medulla spinali egredientium, paria agnouerunt, & recensuerunt. Eorum aliquot modo, qui nobiscum sentiunt, & nervum, inter occiput primamque vertebrae exeuntem, connumerant, laudabo. VESALIUM *de H. C. fabr.* L. IV. C. XI. p. 534. EVSTACHIUM *Tab. XVII. fig. II.* MASSAM *Libr. Introd.* p. 103. VIDVUM VIDIVM *Anat. G. H. L. III. C. III.* VASSAEVM *Tabul. III. p. 129.* MOSTELIUM *synops. nervor.* CABROLIUM *Anat. du Corp. hum.* p. 75. VESLINGIUM *syntag. anat.* p. 180. ARCH. PICCOLHOMINVM *Anatom. Praelect.* p. 266. SPIGELIUM *de H. C. fabr.* p. 188. & 194. C. BAVHINVM *Theatr. Anat.* L. III. C. XXIV. C. BARTHOLINVM *Anat. Instit.* p. 270. & 396. ROLFINCIUM *Dissertat. Anat.* p. 770. TOB. KNOBLOCHIVM *Disputat. XIV. C. IV.* S. PAVLVM *apud van Horne opusc.* p. 185. CELLERVM cum BOERHAVIO *Comentar. in Boerhau. Vol. II.* p. 570. Huc quoque facit VIEUSSENIUS, secundum datam nostram §. XIV. tum Tabulae eius vigesimae, tum verborum eius explicationem. Quanquam videatur, VIEUSSENIUM in Tab. XX. fig. I. triginta paria cum nervo impari exprimere voluisse. Certe tamen persuasus sum tria infima filamenta veras esse productiones durae matris, de quibus diximus in *Progr. n.* §. VI. p. 8. & quae nunc ad tuendam nostram sententiam exprimere in Icone nostra I. curauimus. Nunquam desunt filamenta illa; Sed gangliis aequae carent, ac portione medullari,

ri, & praeterea planitie sua, breuitate, exilitate, ac insertionis modo facile distinguuntur a nervis vicinis. Figura vero secunda eiusdem Tabulae XX. omnes facile convincit, VIEUSSENIUM triginta solummodo paria vidisse nervorum spinalium, connumerato decimo Willisii; quamvis Auctor excepto hocce nervo Willisii triginta paria numerat *l. c. p. 153. & 213.*

(4) Paucissimi sunt Anatomici viginti novem tantum paria numerantes. Ita tamen sentit GALENUS de Us. Part. L. XII. C. 15. p. 197. b. FERNELIUS *Physiolog. L. I. C. X.* MARCHETTI *Anat. p. 126.* Nonnulli quoque viginti novem paria adesse ordinario putant, & quandoque trigesimum addunt, qui constantem numerum reiciunt, & variantem maxime agnoscunt; Uti FALLOPIUS *de ossibus C. XVII. edit. Venet. T. 3. p. 143. b.* (quod in *edit. Francof. est XVIII. caput*) VALVERDA *L. 7. c. 8.* IAC. SYLVIUS, qui *Isagog. L. III. C. XVII.* dicit in Rhachi (s. medulla spinali) viginti novem paria nervorum produci, & tamen eorum triginta paria numerat *ibid. L. II. C. VI.* TH. BARTHOLINUS quoque modo triginta paria, modo viginti novem adesse dicit *Anat. renov. Libell. III. C. III. & alii.*

(5) Sic tamen constantissime triginta vnum paria tribuerunt medullae spinali ALEX. ACHILLINUS *Annotat. Anatom. p. XV. b.* IAC. CARPUS *Isagog. p. 63. edit. Bonon. & Commentar. in Mundinum p. CCCCXCIX. b. & p. CCCCC,* ubi contra GALENUM auctoritates veterum Arabum allegat, triginta vnum quoque paria assumentes, HALI, RASIS, AVERROYS, (vid. Averrhoys liber colliget dictus p. 4. b. edit Venet. 1490.) AVICENNA. Cum vetustissimis hisce Anatomicis quoad nervorum enumerationem convenit omnino WINSLOWIUS; etiam si *Trait. de la Tete N. 130. & Tr. de Nerfs N. 167.* triginta circiter paria nervorum medullae spinali adscribit. Quando enim demum ad singularem nervorum descriptionem peruenit *Tr. de Nerfs N. 170. & seqq.* Collo septem tribuit, dorso duodecim, lumbis quinque, & N. 298. ossi sacro ordinario paria assignat sex. Si iam hisce triginta paribus Nervus eius Infraoccipitalis, seorsim recensitus, adiungitur, erunt omnino triginta & vnum paria. Sed plures adhuc nervos, a medulla spinali prodeuntes, perspexisse videtur HEISTERUS, qui praeter nervum, inter os occipitis primamque vertebra elabentem, (quem uti iam diximus, non agnoscit) nihilominus triginta duo paria numerat. Quomodo vero numerus iste compleri possit nervis, cuique classi ab eo assignatis, plane non video, cum ossi sacro quinque solummodo paria ut plurimum tribuat, & ne verbum de sexto aliquo nervo ossis sacri proferat.

(6) *Anatom. Liber Introduct. p. 102. b.*

(7) *De ossib. Cap. 7. de Usu Part. p. 194. b. & Isagog. p. 54. b.*

- (8) *De Structur. homin. oper. Tom. I. p. 285, edit van der Linden.*
- (9) *De Re medic. L. VIII. C. 1.*
- (10) *de ossib. Cap. XVII.*
- (11) *oss. Exam. p. 210. l. 2.*
- (12) *de Re Anat. p. 263.*
- (13) *de ossib. Cap. 9. vbi rarius superesse quam deesse inueniri dicit.*
- (14) *Anat. C. H. L. I. C. XVI. qui contra GALENUM, vti videtur, dicit
ibid. rarius deesse unam vertebra quam superesse.*
- (15) *loc. allegat. p. 216. l. 14.*
- (16) *l. c. p. 52. & 263.*
- (17) *Anat. C. H. p. 46. edit. Venet.*
- (18) *Obseruat. Anatom. p. 55. Tom. 1.*
- (19) *Commentar. de ossib. cap. XV.*
- (20) *l. c. L. I. C. XVIII. & fig. 1. & 2. eiusdem Capitis.*
- (21) *Anat. du Corp. H. p. 75.*
- (22) *Tabul. oss. H. C. p. 47.*
- (23) *de ossib. c. X, & XI. vbi figurae quoque exstant aliquot.*
- (24) *l. c. L. I. C. XVIII. & L. VIII. C. VIII. p. 211. l. 21.*
- (25) *Anatom. Praelect. p. 266. & 367.*
- (26) *Anatom. p. 84. & 86.*
- (27) *Theatr. Anatom. L. I. Tab. XXXIX. fig. VI. & VII.*
- (28) *Histor. plerorumque part. C. H. p. 134.*
- (29) *de ossib. p. 102.*
- (30) *de ossibus C. H. §. 141.*
- (31) *Traits de os Sec. n. 510.*
- (32) *loco mox allegato.*
- (33) *loco allegato p. 220.*
- (34) *pag. 37.*
- (35) *de H. C. fabr. L. II. Cap. XXI. & Tab. IX. eiusdem libri fig. I. & II. os fa-
crum optime depictum exstat, quinque Vertebri constans, ac quatuor fo-
raminibus.*
- (36) *Isagog. de ossib. Cap. XVIII. & Commentar. de Ossib. C. XVII.*
- (37) *Anatom. Institut. p. 476.*

§. XXVIII.

Ex tradita Neruorum structura, quantum potui exacta, quisque facile perspiciet triginta recensita paria, (exclusis ab eo numero Accessoriis,) Spinales s. Vertebrales Nervos dicendos esse, quamuis numerum vertebrarum superent. Neque enim minor vertebrarum numerus turbare debet numerum neruorum, minus adhuc eorum exactam ac limitatam divisionem in Classes, pro ratione Vertebrarum dispositas.

Quantum vero Opiniones Veterum aequae ac Recentiorum, horumque praeprimis inter se, recedant a se invicem in dispositione harum Classium neminem fugit. Vnde in perpetuum Tirones non solum, sed & ipsi minus exercitati Anatomici, inprimis vero Physiologi dubii erunt de vera v. gr. Nerui ad Aures, Nerui Diaphragmatici, neruorum Brachiorum ac Crurum, & Splanchnici origine, item de certis Nerui Intercostalis communicationibus atque gangliis &c. Et hoc ideo obscurum est, quia non quisque Anatomicus secundum suam classium dispositionem de iis loquitur. Exemplo res magis elucescet. Sunt Auctores Classici, qui Neruum primi Paris Ceruicis nobiscum pro tali contra WILLISIVM agnoscunt, quem tamen inter primam & secundam Vertebrae elabi asserunt; Nihilominus iidem Collo octo paria, toti vero spinae triginta vnum Paria adscribunt. Ex qua neruorum enumeratione ac dispositione sequitur, Nervum octavi paris s. infimum Colli per intercapedinem primae & secundae vertebrae costas dimittentium profilire, & sic insequentes ex ordine, ut tandem trigesimum primum Par longe infra os sacrum, ipsumque os Coccygis euagaretur. Hi idem Anatomici nihilominus vnum aliis, longe aliter quamuis nervos spinales disponentibus, nervum Diaphragmaticum a furculis nerui tertii, quarti & quinti paris Colli deriuantem tradunt; Et ita quoque in historia reliquo-

liquorum nervorum, a spinalibus productorum, v. gr. Brachialium, Cruralium, &c. pergunt Superiorum sententiam sequi; quanquam in Nervorum numero, ac dispositione, longe ab iis dissentiunt. Sunt dein alii, qui, connumerato decimo Willisii, infra os occipitis prodeunte, septem tantum paria Ceruici tribuunt. Sunt porro alii, primum Par Cervicalium inter secundam & tertiam Vertebrae prodiens afferentes (1). Et accuratiores, Veteres puto, octo collo annuerant paria Nervorum; primo eorum primae vertebrae supremam partem perfodiente (2). Ex his cuique in promptu erit iudicare, quantum quidam horum Anatomicorum a vero aberrant, & quam diuerse idem nervus numeretur atque appelletur. Non inutilis ea propter labor erit, Nervos Vertebrales omnes ad certas ac perpetuas classes redigere, eorumque ramificationes exacte tradere, quo facilius Nerui illi primarii, a vertebralibus generati, ad constantem, quantum naturae lusus patitur, formulam redigi possint. Si ea, quae non indiligenter de medulla spinali adhuc tradita a nobis sunt, bene consulantur a studiosis, ramificationes ac distributiones Nervorum Vertebralium omnium, quod singulare sibi opus requirit, alio tempore tradere summo studio conabor. Spero simul mihi tum tempus & occasionem nascituram, omnem medullae spinalis, eiusque nervorum pertractationem combinandi & paulo correctiora sub vna forma typis recudendi. Cum praesertim multum mea intersit, ea, quae non pauca sunt, in Programmate meo de Medulla spinali minus polita, & hinc inde obscura, nec satis mentem meam exprimentia, corrigere; quae vel parum ea tempestate exercitatus lego scriptor, & cultello magis atque observationi, quam calamo atque dictioni assuetus, in magna festinatione nimis abrupte ac secure protuli; vel parum oculatus attentusque emendator operorum peccata praetervidi.

(1) Il nempè quia decimum Willisii, inter primam & secundam vertebrae claudens, nervis cerebri annuerant.

(2) de quo in fine proxime insequentis paragraphi dicetur.

§. XXIX.

Super est nunc, vt paucis adhuc verbis indicemus ; quomodo Nerui haëtenus descripti secundum Classes suas disponantur. Erunt secundum receptam in scholis Anatomicorum doctrinam alii Nerui Colli; alii Dorfi; Lumbales alii; alii osfis sacri. Qui omnes scramina sua habent, à binis semper vertebris relicta, neruis proportionata vtcunque, non autem iis solis accommodata ; vti construenti sceleta optime patet. De numero Neruorum Dorfi, atque Lumbalium, fere non disputatur, sed omnis difficultas circa Nervos Colli & osfis sacri versatur. Si in numerandis Neruis Colli nulla ratio haberetur vertebrarum turbae multae evitarentur ; quod licet systemata & determinatas Classes amantibus minus placeat, tamen ex natura rei constat, Nervos tantum dorfi, Lumbales, & osfis sacri respondere suis vertebris. Vix igitur definientur commodius, quam sic ; vt horum Neruorum quisque vertebram sibi suam, cuius numerum & nomen seruat, supra se positam habeat. Ita v. gr. Nervus, per intercapedinem Vertebrarum Dorsalium primae & secundae elapsus, erit neruorum Dorsalium primus, & sic deinceps. Cur autem Colli Nerui non ad eandem formulam referri possint, id ipsi Nerui, septenarium Vertebrarum numerum excedentes, impediunt ; vel potius primi Nervi (qui est decimus Willisii) connumeratio. Hic enim si excludatur è numero eorum, omnis enumeratio expeditior esset, & , vti de reliquis dictum est, vertebrarum numero responderet. Tyronibus quoque, iisque, qui ex Cadaueribus observationes in recenti (vti decet) annotant, ea ratio numerandi accommodatior esset. Haec omnia probe perspecta habeo ; Non tamen commodò nostro consulendum est, quamprimum rei natura aliud iubet. Nouum argumentum, quam non facile sit, partes Corporis humani vel earum actiones ad certas regulas redigere.

gere. Ita commodissima & expedita est apud Physiologos explicatio Neruorum Cerebri, & Cerebelli; indeque deducta distinctio in Vitales & Animales, nempe Nervos. Qui Nervos, ad vitam facientes, a Cerebello deriuare volunt, alios a Cerebro. Quandoquidem vero natura nos alia docet, itidem & nos alia accensere debemus. Vtunque sit, Natura (ratio sc. sufficiens) nos iubet, Neruorum spinalium supremum (a WILLISIO decimum Cerebri dictum) ad nervos vertebrales, vti iam toties dictum est, recensere. Quamquam solo mutato nomine Nerui Vertebralis s. Ceruicalium primi, in Infraoccipitalem omnis difficultas ablata esset. Posset insuper alio quoque modo huic incommodo obuiam iri. Si nempe octauum Par, secundum accuratos Anatomicos ad Nervos Thoracis referatur. Istud autem Consilium mihi minus placet quam prius. Quandoquidem nullo modo Par octauum Neruis Thoracis annumerari potest, cum nullum det Nervum Costalem, vti reliqui, nec quid cum costis (a quibus Nerui Thoracis nomen suum habent & costales quoque appellantur) vel cum reliquis neruis thoracis commune habeat. Ac praeterea sic osi sacro immerito sex paria adscribi deberent. Ad primam itaque Nervorum Vertebraliū Classē constituendam, octo ei assignanda sunt paria (1), quae Neruorum Colli, Ceruicis, vel Nuchae nomine apud Anatomicos veniunt. Equidem sollicitor interdum, ob summam structurae similitudinem & coefficientiam ad Nervos brachii, iis nonum par addere, nisi ratio habenda esset nerui costalis, ab eo provenientis, & vertebrarum ratio, costas emittentium, inter quas positum est.

Primum igitur par Neruorum Ceruicis per singulare foramen vtriusque, occipitis ossis primaeque vertebrae commune, exit, quod simul etiam arteriae Vertebrali aditum ad Cerebrum concedit, & in sceletō ad vtrumque os, in vertebra tamen longe notabiliorem, finem impressum relinquit;
non

non autem ad mentem quorundam veterum (2) per singulare, & proprium foramen primae vertebrae fertur. Reliqua Paria ex ordine, dicto modo, per intercapedines vertebrarum prodeunt. Infimum ergo Ceruicalium, s. octauum Par inter septimam vertebrae Colli primamque dorsi emergit.

(1) Quamuis pauciores inueniam Anatomicos, pro me facientes; series contra, qui septem tantum neruos Ceruici assignant, multo longior sit; malui tamen octauum par neruis ceruicis annumerare, quia cum superioribus communem habet naturam, nec quidquam vel leuissimi furculi, cum costis excurrentis, quo Costales vel Thoracis nerui distinguuntur, dimittit. Ut itaque non videre possem, quo iure thoracis neruis adiungi possit. Meo cum faciunt I. CARPVVS *Commentar. in Mundin.* p. CCCCC. & CCCCXI. & CCCCXVI. & *Isagog.* p. LXIII. NIC. MASSA *Libr. Anat. Introd.* p. 101. b. FERNELIVS *Physiol. L. I. C. 10.* MOLINETTI *Diff. Anatom. Pathol.* p. 202. Isb. DE DIEMERBROECK *Anat. C. H. L. VIII. C. II.* ARCH. PICCOLHOMINVS *Anat. Praelect.* p. 266. & HEISTERVS *Comp. Anat. T. I.* p. 164. qui sine dubio eosdem neruos intelliget, ac isti Auctores. Si WINSOWII neruis cervicalibus neruus Infraoccipitalis additur, erunt quoque octo paria; cum septem paria, infra dictum neruum exeuntia, collo tribuat *Trait. des Nerfs n. 167. & sqq.* atque *Tr. de la Tete n. 148.* Sed contra hosce laudatos Viros facit ab altera parte Auctoritas GALENI, VESALII, SPIGELII, INGRASSIAE, VESLINGII, RIOLANI, MARCHETTI, C. & TH. BARTHOLINORVM, VIEVSSENII, IAC. SYLVII, C. BAVHINI, S. PAVLI, LAVRENTII, locis plerumque supra iam allegatis; Atque plurimorum aliorum, septem solummodo collo assignatum; praeter eos, qui decimum neruum WILLISIIa cervicalibus excludunt.

(2) Ita GALENVS *de Vf. Part. L. III. C. 3. & 4.* copiose de eo foramine agit, ac mirificum eius mechanismum admiratur; & *ibid C. 5.* rursus de eo agit, vti & Auctor libri de *Anatom. vivorum Galen. oper. T. I. Spur.* p. 54. b. Dein quoque post GALENVVM I. CARPVVS *Commentar. in Mundin.* p. CCCCC. b. & *Isagog.* p. LXIII. N. MASSA *Anat. libr. Introd.* p. 101. b. paucique alii illud foramen ad vtrumque latum in prima vertebra exsculptum agnouerunt. ARCH. PICCOLHOMINVS autem *Anatom. Praelect.* p. 265. atque FERNELIVS *Physiol. lib. I. cap. X.* foramen illud obscurum dixerunt. VESALIUS vero *Anat. C. H. p. 78.* atque INGRASSIAS *de off. p. 165.* iam demonstrarunt GALENVVM a canibus forte, quibus talia sunt foramina, delu-

delusum fuisse. Nec ipse EVSTACHIUS, qui GALENI sententiam, quantum potest, tuetur, aliter potuit, quam contra GALENUM affirmare, finem solummodo esse in homine pro transmittendo primo nervo colli, in finis autem integrum reperiri foramen. *Ossium Exam.* p. 214. l. 2. Videantur praeterea quae §. XII. not. 5. de hocce finis diximus. Sed nemo amplius dubitat de sulco illo duplici ad constituendum foramen.

§. XXX.

Nervorum *Thoracis*, qui etiam Nervus Dorsi, Pectoris, Costarum, vel Intercostales dicuntur, numeratio planior & omnibus fere Anatomicis communis est. Quandoquidem ii semper respondent numero Vertebrae, (duplici tamen) quarum ordinario sunt duodecim. Si iam earum undecim tantum, quod rarius est, reperiuntur, idem erit numerus Nervorum. Si vero ordinarium numerum excedunt, & tredecim (quod aliquoties, absque vertebrae lumbalium dispendio vidi) reperiuntur, totidem quoque erunt Nervus dorsales (1). Supremus sub prima vertebra dorsalis prodeit, & infimus, s. duodecimus nervus, intra infimam vertebrae dorsi primamque lumborum exit. Interim tamen, in re tam evidenti, placuit COLVMBUS (2) contra magnum VESALIUM thoraci undecim solummodo nervorum paria, (sed male) adscribere. Ratiocinium quidem eius de duodecim vertebrae, undecim tantum interstitia relinquentibus, recte se habet; quamprimum vero tota vertebrae compages consideratur, ratiocinium illud cadet. Nihilominus COLVMBUS sibi asseclas peperit, RIOLONUM (3), MOLINETUM (4), MARCHETTUM (5), ROLFINCIVM (6), ac forte alios.

(1) Quoad hasce varietates videantur quae diximus §. XXVII.

(2) *De Re Anat.* L. VIII. cap. VI.

(3) *Anthropol.* L. V. C. XLIX. Quamvis ibidem, uti & in *Enchirid. Anat.* p. 450. in generali divisione nervorum thoraci duodecim paria annumeret.

(4) *Dis.*

(4) *Dissert. Anat. Pathol.* p. 203.

(5) *Anatom.* p. 126.

(6) *Dissert. Anat.* p. 771.

§. XXXI.

Nervi per vertebrae, sphondyli Renum, Lumborum vel Alchatim dictas, exeuntes, & *Lumbales* dicti, non facile superant numerum Vertebrarum quinarium. Iam monuimus (1), interdum, quando sc: tredecim costae reperiuntur, quatuor solummodo vertebrae Lumbales, quatuorque Nervos numerari, dicto modo egredientes. Nempe primum par inter infimam vertebrae thoracis primamque lumborum exit; vltimum par vltimae vertebrae eiusdem nominis subiaceret, & ossi sacro impositum est. Caeterum constantissime ab omnibus Anatomicis quinque numerantur paria, & ipse COLVMBVS quinque recenset (2). Ac soli forte BARTHOLINI (3) dicunt, eorum esse aliquando quatuor, aliquando quinque paria.

(1) Paragrapho vigesima septima.

(2) l. c. L. VIII. C. VII.

(3) C. BARTHOLINVS *Anat. Instit.* p. 396. & 412. TH. BARTH. *Anat. renov.* p. 685.

§. XXXII.

Quamvis Anatomici non conveniant in numero Nervorum *Sacralium*, infra Vertebrae Lumborum prodeuntium; & plerique ossi sacro sex paria adscribant (1); praeter alios qui infimos nervos spinales in nervos sphondylorum Alhauus (s. ossis sacri) & alhosos (s. ossis coccygis) subdividunt: Mihi tamen cum Recentioribus Anatomicis res satis evidens apparet. Et cuique naturam in recentibus cadaueribus scrutanti planum & indubium

K

erit

erit, ordinario , & quam rarissime aliter , quinque paria Nervorum, ab osse, quod perforant, sacro nomen adepta, inueniri; quae pro ratione ossis sacri, vtcunque quinque vertebrae repraesentantis, numerum nervorum vertebraliū claudunt. Qui nerui, instar superiorum, binarum quasi vertebrarum intercapedines perforant. Cur autem Veterum Anatomicorum plerique ossi sacro quinque integra foramina absque conniuncto osse coccygis adscripserint, Iconibusque ea exhibuerint, non satis mirari possum (2). Hoc forte errore & alii commoti fuerunt, vt sex paria Nervorum ossi sacro adscriberent. Alii vero aliam longe ob rationem quoque sex Paria constituerunt, neruum, inter supremam ossis sacri faciem infimamque vertebram Lumbalium prouenientem, nervis sacralibus adscribentes. Alii demum reuera sex paria adesse putant, quamquam cuique Neruo Vertebram sui numeri impositam agnoscerent. Alii pro ratione variantis numeri Vertebrarum ossis sacri, modo sex, modo quinque recensent. Quae autem mens nostra de hac re sit, maxime ex §. XXVII. petendum est; vbi prolixè satis de nervorum numero egimus. Dein etiam ex nostra Classium dispositione atque egressu Nervorum satis patet, non posse ordinario vltra quinque paria ossi sacro adscribi, nec vllum ossi Coccygis tribui. Ac praeterea ossium syntaxis nos satis docet, quam rarum sit, os sacrum reperire, sex ossibus constans. Mihi saltem nunquam hactenus contigit, neque in recentibus Cadaveribus neque in sceletis talia, ex sex partibus constantia, & quinque foramina efficiencia, ossa sacra videre. Et, nisi omnia me fallant, ea ipsa duo sceleta, a VESALIO olim in Academia mea patria, quae Basileae est, nitide parata, & in auditorio Medico aestivo pro magno ornamento in perpetuam magni VESALII memoriam exposita, ac optime seruata, ossa sacra praebent quinque tantum ossibus constantia cum quatuor interceptis foraminibus. Minus adhuc sex Paria Nervorum, per os sacrum pro-

prodeuntia, parare ac detegere vnquam potui. Bene tamen (vnica quanquam vice exacte) praeter allegatum obscurum par trigessimum primum, §. XXVII. indicatum, tenuissimum filamentum nerueum infra quintum par perspexi, circa latus vtrimque ossis coccygis se voluens, & ab interiori peluis facie ad posticam eius prorepens; quod ex combinatione infimi Nerui Intercostalis cum quinto neruo ossis sacri productum esse mihi videbatur; Forte hoc ipsum filamentum vtriusque lateris Anatomicis imposuit, vt illud pro trigesimo primo Pare acceperint.

Nerui isti Sacrales a reliquis duplici egressus modo differunt. Quis enim ignorat sacri ossis ossa, praeter foramina, ex communi specu osseo exeuntia, ab antica & postica facie foramina exsculpta habere. Vt ita a quouis neruo, excepto infimo, os sacrum triplici modo perforetur; primum foramen cuiusvis nerui cauo vertebrarum communi respondet, & truncum admittit; duo alia foramina propaginibus cuiusvis nerui, ad anteriora & posteriora profilientibus, viam concedunt. Non tamen foramina ista vnice in gratiam neruorum exsculpta sunt; cum maxima eorum pars vasis sanguiferis ac pinguedine oppleta reperiatur, inprimis posticorum. Surculi nervei, per postica foramina ossis sacri profilientes, tenues quamuis, facile tamen conspiciuntur, si caute res pertractetur; inprimis autem surculi primi, secundi, & tertii paris evidentes maxime sunt; nec non ii quarti paris in adultis interdum conspici possunt. Hosce surculos posteriores non semel parauit ac perspexi (3). Quintum vero, quod vltimum est, par simplici via ad latus vtrimque ossis coccygis, infra vltimam ossis sacri partem, quae semilunatum hiatum deorsum spectantem relinquit, excurrit.

Haec sunt, quae hoc tempore dicenda habui. Integram Medullae Spinalis, eiusque propaginum historiam persequi iam non licet. Alias tamen fidem, supra datam, liberabo, si

Deus vires, sanitatem, aptamque officinam, mihi porro concesserit. Si quid hic quoque peccatum sit, libenter, humane praesertim monitus, emendabo. Bonam quidem fidem & attentionem in nobis non desiderabit, qui cum ipsis Archetypis, & natura adeo, observata nostra contendere voluerit.

(1) Laudati §. XXIX. Anatomici omnes, collo septem paria adscribentes, ossi sacro sex tribuunt paria nervorum. Et vicissim plerique, collo octo paria assignantes, ossi sacro quinque vel & quatuor tantum paria tribuunt. Hi primum par per ipsam substantiam ossis sacri, vel potius intra primam & secundam vertebrae eius ferri dicunt; illi autem primum par intra infimam vertebrae lumborum & primam ossis sacri elabi volunt maxima ex parte. Vt non opus sit eos iterum recitare, quia optime intelligi possunt ex §. XXVII.

(2) Videantur ea, quae dicta sunt §. XXVII.

(3) Duplex horum nervorum egressus, ab antica alius, alius a postica ossis sacri facie Veteribus Anatomicis optime iam cognitus fuit. Et WINSLOW quoque filamenta ea, quae quatuor priora paria (sex enim paria ossi sacro ordinario tribuit) emittunt, verbo indicat *Trait. des Nerfs* n. 300. Quod autem HEISTERVS *Comp. Anat. T. I. p. 165.* negat, tales adesse surculos posteriores, & multos praeterea scriptores reprehendit, quasi eos surculos male agnouissent, mirari subit. Equidem meas observationes maximam partem e iunioribus Cadaveribus desumsi; nec unquam surculos illos, in superiorum duobus vel tribus saltem nervorum paribus, non vidi; quo magis ea in adultis ita se habere certum est.

EXPLICATIO ICONVM, ex infantibus trium circiter annorum ad viuum delineatarum.

ICON PRIMA Medullam Spinalem repraesentat, vel potius Durae Matris productionem, spinalem medullam eiusque nervos inuenientem; prout se in situ naturali, in specu vertebrarum habet, vna cum nervis vertebralibus omnibus, eorumque directione, situ & magnitudine naturali; omnia a postica facie spectata. Ad evitandam obscuritatem nolui ipsas simul vertebrae exprimere, sed earum loca inania specia relinquere.

A. Vertebrae primae colli pars antica, paulum oblique sursum eleuata.
a. a. Eius sinus articularii.

b. b. - - processus transuersi cum foraminibus suis.

B. B. Inuolucrum medullae spinalis, a dura matre productum, ab occipitis osse ad medium vsque os sacrum continuatum, saccum fere repraesentans.

C. - C. Cavitas seu interstitium, inter durae matris thecam & thecam osseam intercedens, nigro colore distinctum, quo optime conspici possit, quam viam secundum diuersas directiones nervus quisque in cauo eo faciat; quorum ganglia intra specum vertebrarum generentur, quorum non; & quo modo Nervi ex ordine ad certas ac diuersas distantias foramina sua subeant.

D. Ligamentum ex infimo durae matris sacco secedens, & recta inter infimos nervos ad os coccygis, cui infigitur, descendens. Hoc Veteres pro nervo impari habuerunt.

E. Dentis secundae vertebrae supereminens mucro.

F. Medulla spinalis ad ortum abscissa.

I. ad 30. vsque. Nervi spinales omnes sinistri lateris, vna cum gangliis suis.

IC. ad 8C. Octo nervi Cervicis lateris dextri.

ID. ad 12D. Duodecim nervi Dorfi.

IL. ad 5L. Quinque nervi Lumborum.

IS. ad 5S. Quinque nervi ossis Sacri.

c-c. Gangliorum triginta paria, pro diuersa regione diuersa; sibi ex utroque latere exacte respondentia; quamvis in dextro tantum latere litteras iis apponere commodum fuerit.

d. Nervi primi paris ramus, antico vix minor, in sinulo suo circa finem articularium circumflexus, & antrorsum vergens.

e. Eius ramus alter postice versus Cervicem abiens.

f. Ner-

- f. Nerui secundi paris ramus maior, qui postice fertur, & minor
- g. antrorsum vergens.
- h. Ramus ganglii tertii paris maior, qui antrorsum ad collum fertur:
- i. Minor versus spinam vergens.
- k. - k. Filamenta s. ligamenta quatuor, ex infimo durae matris apice, duo vtrunque, secedentia, & ossibus vicinis infixi.
- l.l.l. Foramina in ipsis gangliis vel intra ea, pro transitu vasorum intra thecam osseam, frequenter in his locis conspicua.

ICON SECUNDA a facie quoque auersa, vti prior, spectata, Medullae oblongatae partem, in infima basi Cranii positam, refert, omnemque ex ea productam Medullam spinalem in situ & connexione naturali intra thecam vertebrarum, quae tamen conspici nequit, sitam, & ab omni inuolucro, excepta pia matre, denudatam exhibet. - Vbi notandum, quod ossis occipitis pars postica adusque arteriae vertebralis comitisque nerui transitum, vti & vertebrarum pars postica, ablata sit, pars autem anterior ossis occipitis, & ossis petrosi portio paulum eleuata & retrorsum inclinata spectetur. - Lobi Cerebelli vero cum vermie antrorsum inclinati sunt, quo commodius Ventriculus quartus, partesque ei vicinae conspici ac indicari possint.

- A.A. Spacium, quod lobi Cerebelli reclinati, vna cum processu eorum vermiformi
- B. ruditer adumbrato, occupant.
- C.C.C.C. Portiones ossis petrosi & ossis occipitis, dura matre inuestitae.
- D.D. Medullae oblongatae pars, ex qua dein Medulla spinalis continua serie descendit.
- a.a. Striae albae medullares ex ipso ventriculi quarti sulco surgentes, & ad neruum septimi paris mollem vtrunque abeuntes.
- b. b. Ventriculus quartus.
- c.c. Eius sulcus longitudinalis continuatus cum rima calami scriptorii.
- E.E. Medulla spinalis.
- d. Eius duae Eminentiae, fere orbiculares, in quas definit infimus medullae apex, quae totae laeues sunt, nulla filamenta neruea dimittent.
- e. - e. Ligamentum, ex infimo piae matris apice cum vasis sangiferis, hic non expressis, productum, per mediani caudam equinam excurrens, & per infimum durae matris apicem elabens, sicque neruum impari mentiens, tandem vero in osse coccygis dispersum desinens; aciculis sustentum, quo clarius conspici possit.

- f. f. Ganglion vigesimi noni paris neruorum.
- g. g. - - - - trigesimi paris, ex quo in sinistro latere praeter neruum eiusdem numeri alius insuper neruulus, propriam intumescentiam gangliiformem efficiens, exit, h. insignitus.
- F.-F. Medullae spinalis theca a dura matre producta, hic per medium discissa, vtrimque reclinata, & acicularum ope expensa.
- G. G. Nerus septimi paris.
- H. H. - - - octauu paris, in dextro latere duplex foramen in dura matre habens, in sinistro simplex.
- I.-I. Nerus Accessorius a prima eius inter sexti & septimi nerui postica filamenta origine, in sinistro latere distinctius expressa quam in dextro, adusque exitum per duram matrem. In sinistro latere peculiare durae matris foramen subit, in dextro communem cum inferioribus filamentis nerui octauu paris viam facit. Nerui huius partiones, filamentis nerueis obiectae, punctis indigitatae sunt.
- i. - i. Eius radicae, quarum quatuor sunt filamentosae, e medulla oblongata ortae, & sex simplicis originis, e medulla spinali exeuntes, partim distincte conspicuae, partim quoque, quae filamentis nerueis obiectae sunt, punctis indicatae.
- k. - k. Filamenta neruea communicantia, ab vnius nerui filamentorum infimo ad alterius supremum oblique transeuntia; vbi notandum non sat bene expressa esse, cum singulorum altera portio cum superiori neruo excurrent non conspiciatur, sed tantum furculus communicans.
- K. K. Nerus noni s. ultimi paris Cerebri, vtrimque ex quatuor filamentis constans; quae in dextro latere concurrunt & commune durae matris foramen subeunt, in sinistro autem per duo distincta, nec arcte sibi apposita, foramina elabuntur.
- L. Origo Ligamenti denticulati s. prima eius ad duram matrem adhaesio, ex qua deinde dentes omnes ex ordine conspiciuntur l. - l. ad interstitia neruorum durae matri inserti. Ab vno tantum latere praesentata.
- M. M. Corpora pyramidalia postica.
- N. N. - - - - oliuaria postica. } vtcunque expressa.
- O. O. Arteriae Vertebrales e foraminibus suis exeuntes.
- m. - m. Filamenta neruea ab antica medullae facie accedentia & cum posticis foramina durae matris subeuntia, hinc inde conspicienda, ex parte tantum indicata.
- n. locus vbi filamenta neruea concurrere incipiunt, & caudae equinae basin

basis constituitur. Ibi reliqua medullae portio in situ naturali conspicui definit.

o. locus, ubi desinunt filamenta neruea oriri.

p.- p. Filamentorum caudam equinam constituentium exortus e medulla spinali, quae filamenta utrimque paulum reclinata sunt, quo medullae in medio latentis natura & forma detegatur.

p. p. p. Cauda equina.

i. adusque 30. triginta neruorum vertebralium origines posticae, earumque exitus e dura matre.

i C. ad 8 C. Filamenta neruea octo neruorum Ceruicis. Obserua, duo filamenta nerui primi paris in latere dextro neruo Accessorio immisceri, a quo demum, paulo superius tamen, filamentum, loco originis posticae primi paris, ad foramen arteriae vertebralis fertur.

i D. ad 12 D. & i. L. ad 5 L. item i S ad 5 S. uti in priori Icone.

ICON TERTIA Medullae spinalis portionem e supremo dorso desumptam, & ab antica facie, corporibus vertebrarum respondente, spectatam offert.

A. Ligamentum a pia matre productum, & ad vnam vel alteram lineam medullari substantiae immissum.

B.B. Intumescitiae utcunque vermum sericeum referentes.

C.C. Neruorum filamenta s. origines anticae, filamentosae, ubi plures furculi tenues bina filamenta neruea pro quouis neruo constituunt.

D. Medulla per medium horizont. liter discissa, ubi portio medullaris s. alba E. in ambitu posita conspicitur, & cinerea figura & magnitudo in centro F. exhibetur.



